

KABIJI WA MULUKUNWA

OBE UKANGATA NSAKWA

YABALWANYI BANJI

Amiwa, nobe kimye kyonse, awala umo nangwa babiji kukelwa. Bakafunga baimana, ne kwamba mba, “Pano, Nasaka kwimulondolwela anweba kukelwa konse Mr. Branham.” Kyawama, Amiwa njina bintu byavula bingi byakuuba nanchi Ngikala—Ngikala wakelwa bimye bimo. Bino mukino kimye kechi Nakonsha kwikikwasha ne. Kyajinga mambo alubesha lo lwikyuba mu kino kimye. Nakonsha kutongola pa lubesha ne kupuluka mu aao mambo. Najikupipulako kimye, Mulongo Rose, pachechetu. Mwabuka byepi, Nyenga Rose. Kabiji kyalusekelo pa kwikala lukeelo luno, Mulongo Rose ne Nyenga Rose, kabiji Mulongo Sharrit, kabiji ne balongo bavula, anweba bantu bawama muji koko.

² Naumvwa mba, muntu umo wambula mba, “Inge yanoka mu Phoenix, muntu yense wikalatu mu mwanya,” alo lupipu, mwayukatu. Juba jimo Amiwa nkatambula kajo katutu. Bambula mba wakonsha kutambula kajo katutu kila juba jabula kusaama juba. Amiwa nsakwikimona jaleelo, nsakwibalipisha pa kikyeye.

³ Naambilenga bufuku bwapita, mu kipwilo kimo. Amiwa kechi navuluka jizhina jakyo ne. Kabiji nanchi twajinga na kimye kyawama bingi, bufuku bwapita, mu kimye kya kupwila. Kabiji ne ku Mulongo Outlaw, kabiji kufika ne Tempe, kabiji twajingatu na kimye kyawama mululwe lumvwang’ano lwa bupopweshi. Kabiji Amiwa mbena kuketekela kukumanya bonse balongo ku mbung’eno, nanchi tukekala na kimye kya kwikala pamo, Mulongo Rose, kabiji ne kwisaamba umo ne mukwabo. Kabiji akyo kyo Naishila, ke kwikala na lumvwang’ano lwa bupopweshi. Kabiji twajinga na . . . pa kutala pa mutanchi wetu kabiji ne pakumona mampuzha avula. Bino Nalangulukile mba aje jajinga jishuko jabaya bingi, mambo Nafwainwa ku—ku kumanya bapusanapusana, pakuuba mba ne bamone ne kwisamba nabo.

⁴ Bimye bimo mu kusapwila, yense wamwingilo kechi bamumvwisha bulongo ne, mujishinda jimo nangwa jikwabo. Bimye byavula, bantu batola kintu kyo waamba kabiji ne kwikitwala. . . Kishakaminako pacheche kwi abo, pakuuba mba bekyambe mujojo jishinda. Kabiji pano walondelapo

wikitambula, kyashakaminako pa bayako. Kintu kitanshi mwayukatu, kikala kyafuma mu ndoonda.

⁵ Nanchi—nanchi atweba, bimye byavula, pa kusapwila, Amiwa pipula mwayila madinominesheni ne tubungwe kabiji ne bikwabo. Kimye kimo, bantu baamba mba, “Mulongo Branham ubena kukana kabungwe.” Akyo kingi. Amiwa kechi nashikwapo kabungwe ne. Pakuuba bimye byavula bantu bashakamina pa koka kabungwe, mwamona, kabiji ne kubika luketekelo lwabo lonse pakyokya mukifulo kya Kilishitu.

⁶ Bakeba kumona bamembala baanga bo bakonsha kutwala ku koka kabungwe. Pano, akyo kyawama bingi. Na—Na. . . Akyo kijitu bulongo. Nalanguluka mba kabungwe konse kafwainwa kutwala membala yense ye bakonsha kutana. Akyo kyawama bingi. Pakuuba inge kyaikala kusenda babula kwaluluka ne kwibabika kyabaya pakyokyo kukila kukonkomesha pa Mupashi Wazhila, nobe byajikwambanga Mulongo Rose muno kimye kicheche kyapita, ne bintutu bikwabo, nanchi utwezha—utwezha bintu mu milanguluko, “Atweba twi bakuluwe *lubaji*, kabiji atweba twi bakulolwa *lubaji*.” Nangwa byonkabyo, atweba bonse twi bakulubaji lwa Lesa. Mwamona?

⁷ Pano, inge Namona muntu ubena kuya ku mukola mu bwato. . . Kabiji Amiwa ngikala ku mukola ku Indiana, Mukola wa Ohio, kabiji Amiwa njitu konka ku mpoota. Ke mpuzha yatama bingi, aya mpoota, mambo yakonsha kukuingaula ponkapano. Inge wapita pa mpoota, kechi kujipo bwato bwafwainwa kupitapo ne, mambo paji bibye, pepi nobe mafuutu foote-nangwa-fifite mukuzhika kuya panshi, kabiji kwaikala kimbo popa panshi, akyo kyafika panshi pa jibwe, kyalata kiji popa. Kabiji Naketekela mba—mba—mba kafuloolo, kafuloolo katoka, kaya panshi ya mpoota palepa mafiiti-foote, monai, byafika panshi, byaseluka jibiji peulu. Kabiji nanchi atwajijilatatu na kuuba byonkabya, kabiji atwajijilatatu na kunyema lubilo pepi nobe sikisite nangwa mafiiti sebeti kuzhika. Kabiji momwa muji kimbo kiazhokolosha *yuwe* musango, ne kwi alupula kabiji abwela aya panshi. Kechi kujipo jishinda ja kupulukilamo ne, mwamona.

⁸ Mwanamulume umo wayile kuno kimye kimo kyapita na jekete wa bumi ye amvwajile. Abo bamumwenetu kimye kyo aponejilemo, byo *bya*. [Mulongo Branham waimba munwe wanji—Waku.] Ne yewa jekete wa bumi, awa mukunku wanshita wa mutwajile panshi. Kabiji kechi bamutaine ne. Kafwako wayuka kya mumwekejile ne. Aye wankobamine panshi ya mabwe nangwa kwapela kokwa, kapepo mailoshi umo nangwa abiji na kuzhokoloka, byo bya, kechi wakonsha kupuluka ne.

⁹ Kabiji inge Namona muntu umo kasa abena kuya ku mukola na kabwato kacheche kakala, waikala kasa abena kutanga, nakuya kulutwe, kabiji Ngya na kumubijika kwi aye, “Fumamo

mu bobwa bwato. Abwa bwato kechi bukafunga manyaki ne.” Pano, kechi Njina kintu kimo kyatama na yewa muntu ne, nangwatu inge Nakonsha ku mufumyamo na kwamba kyakonsa kwi aye. Kechi kiji mba Njina kintu kyatama na yewa muntu ne. Namutemwa yewa muntu, bino Nayuka mba wakeimba monka. Ao oene mambo o Mbena kubijikila kwi aye. Mambo uji na . . . Ke mambo akuuba mba Namutemwa aye, oene—oene mambo o Mbena kwambila. Inge kechi Nataka muchima ne, Nafwainwa kwamba mba, “Kyawama, kijitu bulongo,” yangatu, monai, inge Amiwa kechi namuta muchima ne.

¹⁰ Bino ene mambo o Ng’ambila byo byo bintu ke mambo a kuuba mba Amiwa nataka muchima ku Kipwilo. Amiwa—Amiwa nataka muchima ku Kipwilo kya Lesa. Kabiji Amiwa—Amiwa nashikwa kumona Kyaalukatu ke milanguluko—ya bukabungwe. Kabiji nayuka yewa musango, awo ye musango kipwilo kyonse mo kyaya mu mabwe, kuyutu byonkabya, kupita momwa muyewa musango wa bukabungwe.

¹¹ Anweba langulukaitu kusangululwa kwa kimye kya Benaluther, talai ko kyafikile. Kabiji umvwe kyafikatu pa kyokya kipimo, kechi kibwelapo jikwabo ne. Aba Benaluther kechi babwelele ne jikwabo ne. Talai pa ba Methodist ba kwa Wesley, kechi babwelele jibiji ne. Talai pa ba Pilgrim Holiness, ba Nazarene, bonse bashala, ba Baptist, Presbyterian. Baikala na kusangululwa, kabiji muntu umo waimikwa na bulume bwa Lesa pe aye, watatula ng’endo mu Mupashi. Nanchi awa muntu umvwe wafumapotu, abo balengamo kabungwe mu kyokya kintu.

¹² Nobe Sukuulu wa Baibolo wakwa Moody, kifulo kyawama, bino kechi kikekala nobe Moody ne. Mwamona? Kabiji ne byo bya bintu Moody byo aimejilepo, abo bafumako na mamilyoni avula, nanchi abyo byokiji. Kabiji pano bonse kekufundatu, ako Moody wajinga nakyu mu Mupashi, mwamona. Kabiji nanchi anweba—anweba mutaana kyokyo, mu byo bya bintu.

¹³ Pano, byo Natatwile patanshi, kabiji naiya ne kuno ku Phoenix, myaka yapita kunyuma, mu ng’endo ya Pentekosito, najinga na jishuko ja kutapa kabungwe amiwa mwine. Balongo ba Mvula-Wapalutwe baishile kwi amiwa, ne kwamba mba, “Akye ikyo. Twayai tutatule. Kika, kikekala kya—kyabaya kukila pa bonse bashala.”

¹⁴ Naambile mba, “Lusa! Abyo kechi ibyo ne. Akyo kechi—akyo kechi kyo kintu ne, balongo. Anweba muji—anweba muji mamilyoni avula kufuma—kufuma mujishinda. Lesa kechi ukipesha ne.” Tangai jishimikila jenu. Tangai Baibolo. Kechi kukekalapo kabungwe kakwabo kakafumamo, kufuma mu kikye ne. Abyo ibyo. Akye kikebungizha ne kuya mu . . . Kiji mu musango wa Laodikeya. Bino Amiwa nemubuula, balongo, kechi kujipo kabungwe-kapeshiwa na Lesa kakekalako ne.

Kechi kukekalapo kintu kya yuwe usango ne. Tuji pa Kwiya kwa Nkambo. Mwamona? Kabiji Lesa ukalupula bashalapo kufuma mu iye ng'endo ya bupopweshi, ayo ijiko ponkapano, ya Musongwa, bino kechi kukekalapo kintu kya bu kabungwe ne, mwayila bumupashi, jikwabo ne. Mwamona? Kyapwa.

¹⁵ Inge Namona balongo bami, balongo bawama, banshakamina pa kyokyo, nanchi Nekikanatu na bulume bonse bo Nji nabo. Kabiji kimye kimo balongo baamba mba, “Kyawama, Mulongo Branham ubena kwitukana. Atweba. . .” Akyo kyatama. Ami! Akyo—akyo ke kintu kiji kwalepa bingi mumilanguluko yami, ke kunshikwa muntu. Amiwa—Amiwa ne wenu. Amiwa ne mulongo wenu, monai, kabiji mbena kwesekesha mo nayukila kuuba. Kabiji ao oene mambo o Nabujijiile kutwela mu kabungwe kaji konse, nanchi Nakonsha kwimana pakachi kabo ne kwamba mba, “Mulongo, kuuba byobyoye ne. Ajo kechi jo jishinda ne.”

¹⁶ Baamba mba, “Atweba twiba ku Assemblies.” Akyo kyawama. Ba Assemblies of God baikala mapesho abaya bingi kwi amiwa. “Atweba twi ba Foursquare.” Kyawama, talai byo baikala mapesho kwi amiwa. “Atweba twi Yesu Jizhina.” Monai byo baikala mapesho kwi amiwa. “Atweba twi *baumo*, aba *bakwabo*.” Monse mo baikela, bonse ke mapesho. Abo—abo ke bantu bakwa Lesa. Mwamona? Kabiji bantu bakwa Lesa baji mu byonse bye.

¹⁷ Kabiji umvwe twakwantakana atweba bene, na kwamba mba, “Tujitu bawama pacheche papo kukila Kipwilo kya Lesa,” mwamona, nangwa, “Atweba twawama pacheche kukila ba Foursquare nangwa ba Jizhina ja Yesu,” nangwa kintun kimo kiji byobya. Kimye kyo tuji. . . Twakonsha kupusana mu milanguluko pacheche. Atweba bonse twakuya na kuja kajo ka mulajilo leelo, twakonsha kuja pai wapusanako, bino nangwa byonkabyo ke pai kimotu, mwamona. Ao yemwine mulanguluko. Nanchi mwine mulanguluko wa kikye, ke, inge—inge twakonsha kumona lumvwang’ano lwetu. Nanchi kechi mwakonsha kushakamina ku kabungwe ne. Kushakamina ku Kalvali. Obewa wafwa ku bibye bintu bikwabo. Mwamona? Kabiji Naketekela. . .

¹⁸ Lekai ng’ambe kikye kasa kiji mu milanguluko yami. Naketekela mba kabungwe kaingila lubaji lwa mwingilo wawama. Mambo, kuji bimye byavula, balongo, byatama kukila ne byotwanshikwa kulangulukapo, muji bimweka mukachi kentu, ne bintu biji byonkabya, abyo byaikala myendeleko. Kabiji bantu basendakotu aya myendeleko ne kupalang’anya bantu. Kabiji jibumba ja balongo beyapamo. . . amba Amiwa. . . Mo Nemitazha ke kwendela pamo nobe byobaubile mu mooba atanshi kabiji ne bintu byonse. Kabiji—kabiji tujinakyo ne buji leelo, monai, kasa kibena kwendatu. Kabiji bantu bakonsha kwileta abo bene pamo. . .

¹⁹ Kipikichala kine kya Pentekositi, mwaila milanguluko yami, inge kyafika ku kabungwe, mu—mu kipwilo, Mulongo Pethrus, kipwilo kya Filadefya mu Sweden. Pano, abo kechi batako muchima musango wa lufunjisho lo unji nalo ne, kikulutu ke Kyanembwa. Inge mubena kukeba kwikimona *mujije* jishinda, *mujoja* jishinda, nangwa kintu kiji kyonse, kikulutu uji na lumvwang’ano lwa bupopweshi kabiji ne kwikala bumi bwatoka bwazhila. Byobyo kiji. Akyo kyawama. Kabiji inge mubena kukeba kwamba mba Yesu ubena kwiya pa mbili utoka, kabiji mukwabo waamba mba Aye ukeya pa jikumbi jitoka, anweba mupembelelai Aye mujokaja jishinda. Yangatu kulutwe, kikulutu waikala bumi bwawama ne kwikala na lumvwang’ano lwa bupopweshi. Ajo jo jishinda. Abyo byokiji.

²⁰ Amba, kyawama, pano, ao oene mambo, balunda, Amiwa kyo Naikela na jije jibumba ja Bantu basulu. Mambo, Nayuka mba kuji bintu byavula bingi byafwainwa kulolwa. Bino jo—jo jawamisha jo tuji najo. Ee. Abyo ibyo. Ee. Kuji bintu byavula byo Nakonsha kwamba. Kabiji—kabiji anweba, balongo kuno bakemubuula, Amiwa kechi pachika nabo ne. Amiwa nji pano nobe kalume wakwa Lesa, na kubuulang’ana Bukine. Kabiji Nafwainwa kukumbwilapo pa kikye. Abyo ibyo. Mulongo Rose waambile mba, “Oene mambo o twakutemenwa obewa.” Kyawama, akya—akya, kyawama, atweba kechi. . . Atweba—atweba twafwainwa kwikala na kikye Kyambo. Mwamona?

²¹ Nobe kimye kimo kunyuma, Nalanguluka, mwajingamo anweba. . . Amiwa nanjinga kubushiya bwa mikola, nangwa kokwa ku kitulu mwaka wapwa, bajinga na mbung’eno, kabiji bamo balongo bapachikilenga pa bintu bimo mu iye mbung’eno ikatampe mo bajinga na basulu, mwaya kyaalo. Kabiji baambilenga pa, “Najinga na mpuzha icheche pa koono. Mwingilo wami kechi wajinga wawama ne. Kabiji Najinga na kimye kyatama. Kabiji kintu kitanshi mwayukatu, Na—Naishile na kutambula Kilishitu, kabiji—kabiji, oo, Njina bintu byonse pano.” Pano, akyo kyawama. Twasachila kyokyo. Akyo kyawama, bino bubile kechi kimye kyonse kyalumbulula mba Kilishitu ne. Amba, monai, kabiji twafwainwa kutajisha kyokya. Pano, akyo kyawama. Mwamona? Amiwa. . . Kafwako kimo kyatama pa kyokyo ne.

²² Bino Najinga na balongo bakwabo abwa bufuku. Atweba twaile ku motelo ako ji—ji bumba jetu ko twaikelenga, ne Mulongo Shakarian ne atweba bonse. Kabiji Naambile mba, “Kyawama,” Naambile mba, “balongo, Amiwa nsakwimubuula.” Naambile mba, “Na—Naketekela namba anweba balongo mwi jibumba ja bantu bawama bingi bo Nakumanyapo kala, mu bumi bwami. Bino,” Naambile mba, “kine kintu ke kino,” Naambile mba. . .

²³ Amiwa kechi nalamata ku kabungwe kaji konse ne, bino Amiwa nalamata ku lolwa lumvwang’ano lwa bupopweshi.

Amiwa ngikala na kitupa kya lumvwang'ano lwa bupopweshi, kyo kyonka kitupa kyo Nsenda, mambo kyaimenako tubungwe tonse, mwamona. Kabiji akyo kyo Natemwa. Akyo kyo Mbena kulwisha.

²⁴ “Bino,” Naambile mba, “kintu kindetela bulanda amiwa, kyakuuba mba anweba balongo ku meso abooba bantu kokwa, abo baikala bimye masauzande na bubile kukila byo muji anweba, kabiji ke kwibabuula mba Kilishitu bo bunoshi. Kechi mweseke kwibipotesha byo byo ne.” Mwamona?

²⁵ Kechi mweseke kwesakanya na ntanda ne. Lekai ntanda iye mu bifulo byetu. Kechi muye pa bifulo byabo ne. Mwamona? Mwamona? Obewa waya pa bifulo byabo, atweba kechi tukasama nabo ne. Nangwa byonkabyo, Mamboawama kechi asama ne, ateema. Hollywood usama. Ao Mamboawama ateema. Kuji lupusano lwabaya bingi pakachi ka kusama ne kuteema.

²⁶ Kabiji nanchi, pano, kabiji Naambile mba, “Abo balongo batanshi ba ki Pentekosito bajinga na kintu kimo, baesekele kwikikana, kabiji ne kujisha balanda, ne bikwabotu byokabya, kabiji balupikilenga kwakubula nangwa kintu kimo ne, monai, na kusapwila Mamboawama, na kupwang'ana pamo.” Naambile mba, “Pano tubena kweseka kwamba pa bintu byo tuji nabyo.” Naambile mba, “Ke lupusano lwabaya bingi!”

²⁷ Kabiji umo mulongo wawama, pakupitapo bimye bicheche waimene, ne kwamba kwi amiwa, waambile mba, “Mulongo Branham, akyo kyajinga kilubo kikatampe bingi bantu kyo baubilepo.”

²⁸ Kabiji Naambile mba, “Pano, talai, mulongo, Amiwa kechi naambilenga mba bantu bapoteshe byo baji nabyo ne. Pakuuba Amiwa mbena kwesekatu kwambapo kikomo kimo ku baabo basulu.”

Aye waambile mba, “Akyo kyajinga kilubo kikatampe, bantu.”

²⁹ Naambile mba, “Bekyubile kya ku Mupashi Wazhila. Aye Mupashi Wazhila wibabujile mba bobo kyokya.” Aye Mupashi Wazhila ubuula muntu uji yense amba obe kintu kiji kyonse, uba akya kyo Akubuula mba ube.

³⁰ Kabiji aye waambile mba, “Kyawama, kyajinga kilubo kyatama kipwilo kyo kyaubilepo.”

³¹ Naambile mba, “Kika, mulongo?” Kabiji ponkapa ku meso a muntu ye Nesambilenga naji.

³² Aye waambile mba, “Mambo, akuuba mba inge kwaikalatu kwipachika kucheche mu kipwilo, apa pajinga lupusano pakachi ka ba Giliki ne—ne Bahebelu, ne bikwabotu,” waambile mba, “aba bantu kechi bajinga na mpuzha kwa kuya ne. Abo kechi bajinga ne na nzubo ya kubwelako ne.”

Naambile mba, “Kanatu kyaswa muchima wa Lesa.”

Aye waambile mba, “Akyā kyakonsha kwikala byepi kyaswa muchima wa kwa Lesa?”

³³ Naambile mba, “Baile konse konse, na kupalang’anya Mamboawama, mambo kechi bajinga na kifulo kwa kuya ne.”

³⁴ Aye Mupashi Wazhila kechi uba bilubo ne. Kechi wikyuba ne. Byo byonka. Kabiji nobe byo Najikwambanga bufuku bwapita, wafwainwa kukwachijila Lesa, kabiji ne kukwachijila Kyambo Kyanji, ne kukwachijila Konka. Nangwatu Kikutwale kwepi, obewa twajijilatu na Kwikilondela. Kilamaitu kasa kibena kuya byonkabya.

³⁵ Bino Amiwa kine na—natundaika lulwe lumvwang’ano lwa bupopweshi lwa Banabalume Basulu. Kabiji mbung’eno yonse yo Naitwako, Amiwa kimye kyonse ngya na kwamba, ng’amba bintu byonse byo Nakonsha kwamba. Kechi kufwanyikizhatu kintu bya kwambapo ne, akyo kyakonsha kumvwisha bulongo muntu pa muchima ne, *Kikananga-ne-kikananga*. Bino kimye kyonse inge Naya ku mbung’eno, Ngeseka kutanga ne kulomba ne kuzhikilwa na zala, ne kwaamba mba, “Nkambo Yesu, kika—kika kyo Nakonsha kwamba kyakonsha kukwasha bantu.”

³⁶ Muntu yense wayuka mba Amiwa kechi ne musapwishi ne. Amiwa kechi ne ng’ambi ne. Ami—Amiwa . . . Yense wayuka kyokyo. Amiwa kechi ne musapwishi ne. Ami—ami mbila yami ke ya kulombelela bakolwa, kabiji ne bikwabotu bya musango yewa. Bino, Amiwa kechi ne musapwishi ne. Muntu yense wakonsha kuyuka kyokyo, pakung’umvwa kusapwila. Bino byo Ng’amba, Nafwainwa kukokomesha pakuuba mba kyaubapo kintu kimo.

³⁷ Kechi kwambva mba, “Bushe kechi—ye wamba na bulume nenyi? Bushe kechi wingijisha mulaka waitabilwa ne? Bushe kechi wawaina mu pulupiti ne?” Amiwa kechi keba kyokyo ne. Ami—Ami kechi nakonsha kwikyuba ne. Lesa kechi wangichijile kyokyo ne.

³⁸ Bino Amiwa mbena kukeba kutanapo kintu kimo kyakonsha kukwasha yewa muntu, ne kyokya kipwilo kyaikala kipwilo kyawama, kwibakwasha kwikala bantu bawama, na kulombelelapo.

³⁹ Pano, Najikwambanga bibye mambo Najikumona bantu bacheche kasa bakiiya, kabiji kasa ibena kunoka. Ao oene mambo o Nabaambilenga bibye bintu. Pano, kimye kyakila pa konta.

⁴⁰ Kabiji pano Nasaka kusachila mulongo. Namuyuka Mulongo Fuller pa kimye kyabya bingi, kimye kyonse namutemenwe, kufuma panshi ya muchima wami. Kabiji tuji na bintu byavula byo twipansha, Mulongo Fuller. Kabiji nanchi atweba . . . Namwene Mulongo Fuller pa myaka yavula, kabiji Namuyuka mba ke muntu wakine wa Lesa, kabiji Namutemwa. Kabiji Amiwa njikuno lukeelo luno na lumvwang’ano lwa bupopweshi.

Nalomba lulekelo lwa mambo Najikupuswako bufuku bwanji po kyabijikilwe pa kifulo kuno, bino kyajinga kintu kyo Nakonsha kubula kukwasha ne. Kabiji Amiwa njibingi na lusekelo pa kutanwa kuno lukeelo luno, monai kipwilo kyanji, kyawama, Lesa byo ebashukisha ne kwibapesha. Kabiji—kabiji ne bintu byonse Aye byo amubila, Amiwa kine nasachila kyokyo. Lekai Lesa atwajijile na kumupesha, kabiji ne kupesha uno tabbanako, kabiji—kabiji ba—ba kije kya matulasiti, bakwasho, kabiji ne bonse bamembala ba kipwilo. Kabiji lekai mu nkome ne kubila mu bupe bwa Nkambo, ye mulombesho wami wakwikepesha.

⁴¹ Pano, kasa tukyangye kufwenya ku Kyambo, twayai tufwenye ku Nsulo, patanshi. Twayai tukunyike mitwe yetu pa kakimye kacheche tulombe.

⁴² Kimye kyo twaikala na munema mu Kyeenyi kya Lesa, na mitwe yetu ne michima ya kunama, mujipo kyakubila mu muchima obe, akyo intu kyo ubena kukeba, kyo ubena kukeba Nkambo kukupa, pakuuba mba Nemuvulukeko mu milombelo yami muno mu kipwilo lukeelo luno? Mwakonshatu kwikimwasha ponka pa kusutulako kuboko kwenu? Kilamaitu mu milanguluko yenu, byo kiji. Aye Nkambo apane ku umo umo bya kukabila byenu.

⁴³ Walusa kabiji Taata Lesa wazhila, Ao walengele bintu byonse mwi Kilishitu Yesu, konka ku lukumo Lwanji, twaiya mu Kyeenyi Kyenu lukeelo luno na kupana lusachilo lwa mu michima yetu. Kabiji twaendesha kupita mu mvula, kabiji ne mwela ubena kupupa, mvula ubena kunoka, twalomba, Taata Wamwiulu, amba Anweba mwitulwile pe atweba mvula wa Mwiulu, mvula wa bumupashi, mvula wakupelako kabiji ne mvula mutanshi, byonse pamo, mu michima yetu leelo.

⁴⁴ Twalomba, Taata, amba Anweba musa kupesha kino kipwilo. Twasata bingi pa kikyeye, pa kafunga wakyo, ne kipwilo kyakyo, na mambo . . . a mpuzha apo bantu po bakonsha kusambakana paji mutenge peulu yabo ne kipona kyawama kyakwikalapo.

⁴⁵ Tubwela kunyuma mu milanguluko yetu mwayila jishimikila ja Kipwilo kitanshi, akye kitanshi, kya butumwa, Kipwilo kya katolika, kabiji monai byo baikajilenga pa mabwe nangwa pa kintu kiji kyonse kya konsheka, pakuuba mba bomvwe Kyambo kya Lesa, kabiji ne kufukama panshi, kabiji patalala ne mabwe ne ndochi, kabiji popa basutula maboko abo Mwiulu kabiji ne kumvwa buwame bwa Kyeenyi kya Mupashi Wazhila. Ne kwibapa kuchichika kwabaya mu bumi bwabo kyakuuba mba bakonsha kwenda mu jiyengo ja mabokwe, kwakubula ne kwenda pacheche ne, pakuuba bilungi byabo kasa bimwemwesela, na kutala Kwiulu, byo twayuka, mu mamineti acheche, bafwainwa kwikala mu Kyeenyi kya Aye Ye batemenwe.

46 Oo, lwitabilo lwa bashetu, lukiji konka, nangwa kuji tuleya twafishi, kulakauka kwa mujilo ne mpoko. Tubwezhezhai atweba, Anweba Nkambo, lwitabilo lwa musango yewa. Panai kwi atweba mapesho akatampe abutumwa a Mupashi Wazhila.

47 Umo umo leelo abo bajikusutula maboko abo peulu, Mwayuka kyo babena kukabila, Nkambo. Anweba mwayuka byajinga kunyuma ya konkwa kuboko, ene mambo ne kine kintu kiji mu muchima. Anweba bunke yenu mwakonsha kupana kyakubila kiji kyonse, Nkambo. Kabiji Amiwa ne balombelela, kwakubula kuyuka kukabila kwabo ne, bino napana milombelo yami nobe kwipuzha. Nobe kalume Wenu, Nalombelela na bukishika pa muntu yense, namba, kyonse kyo baipuzha, lekai batambule. Bapeshai, Taata.

48 Kabiji pano byo tubena kutanga mu Kyambo Kyenu, ne kufunjisha uno sukuulu wa Pamulungu, byonka byo kyajinga, lukeelo luno, Nalomba mba Anweba musakusenda bibye Byambo ne kufumyapo kubulwa luketekelo lonse pe Abo, Nkambo; kuuba mba, bulume bonse bwa kwa satana bwafwainwa kusapuka, Bwikikanye kubula kukoma, lekai Kiye mu muchima uji yense, kabiji momwa bikale bichi bya bipangwa bya bololoke, Nkambo. Lwitabilo, lulete kyokya Anweba kyo mwatongwejile jimo Kyambo Kyenu amba kyube, kwamba mba, “Kechi kikabwela kwi Amiwa kyatutu ne, bino Kikafikizha kyokya kyo Kyatumijilwe.”

49 Pano, Nkambo, zhijikai kalume Wenu. Kyambo Kyenu kyazhijikwa kala. Kabiji, kyapamo, lekai tujishe jitanga ajo Mupashi Wazhila jo etupelapo ku—kufunjisha. Twaipuzha mu Jizhina ja Yesu. Amena.

50 Pano, kwi anweba mwatemwa kutangapo kimye kimo, kulondela mu—mu Mbila, Nakonsha . . . Ne mwipuzha, inge mwakonsha kuzhikula mu Buuku. Kabiji Amiwa njina Mbila icheche ya sukuulu wa pa Mulungu, nobe, ku bantu lukeelo luno.

51 Mwakonsha kung’umvwa bulongo, konse konse, mumpuzha onse? Najikutwala maikolo foni peulu. Amiwa jiji jami jakuluka pacheche. Amiwa, byo Nafikiletu kokwa, Nasambwile kipakwapakwa. Aye diabola waesekeshe na bulume bwanji bonse mba mbule kwiya kuno. Amiwa kechi nayuka ne. Naketekela mba Lesa usa kwitulwilapo kintu kimo kikatampe pa kukwe kupwila, mambo Satana wauba kiji kyonse kyafwainwa kubiwa pakuuba mba akanye kutanwako.

52 Pano tusakutanga mu Ntendekelo, kyapitala kyabu 22. Kabiji anweba musakuzhikula mu Baibolo wenu, twayai tutange kibese Kyakyo, kyapamo. Ntendekelo 22, twayai tutatwile pa veeleshi wabu 9.

Kabiji baishile pakifulo Lesa kyo amubuujile; kabiji Abulahama washimikile kitapisho kokwa, kabiji

wabikile kunyi mu ndonda, kabiji wamukashile Izaka mwanaji, ne kumubika pa kitapisho peulu ya kunyi.

Kabiji Abulahama watanyikile kuboko kwanji, na kutola mupenyi wakwipayako mwanaji.

Kabiji malaika wa YEHOBA wamwichile kufuma mwiulu, ne kwamba mba, Abulahama, Abulahama: kabiji aye waambile mba, Amiwa Bano.

Kabiji waambile mba, Kechi ukwate kuboko kobe pa mwaana ne, nangwa kumuuba kiji kyonse ne: pano Nayuka mba obewa wamwakamwa Lesa, byo wabula kukanya mwanobe, yeka umotu mwanobe wafuma kwi amiva.

Kabiji Abulahama wasutwile meso anji, ne kukenkenta, kabiji talai kunyuma yanji mukoko wamulume wakwachilwe ku nsengo yanji mu bipupu, nangwa ku nsengo yanji, byonkabyo: kabiji Abulahama waile na kusenda mukoko wamulume, ne kumulambula ponka . . . ke mulambo-wakusoka mukifulo kya mwananji.

Kabiji Abulahama watongwele jizhina ja yoya mpuzha mba Yehoba-umwena: monka mo kyambilwa kufika ne ku juba ja leelo mba, Ponka pa mutumba wa YEHOBA amba uketumwena.

Kabiji malaika wa YEHOBA wamwichile Abulahama kufuma mwiulu kimye kya bubiji,

Ne kwaamba mba, Nechipa Amiwa mwine, byo byaamba aye YEHOBA, . . . byo wauba kino kintu, kyakubula kukana kupana mwanobe, yeka umotu ye uji nanji:

Amba mu mapesho Nkakupesha, ne kuvuzha Nkavuzha ba mu kisemi kyobe pamo nobe tubaangabanga twa . . . mwiulu, kabiji pamo nobe musenga . . . wa ku kitulu kya kalunga ka meema; kabiji ba mu lukunwa obe bakeyangata mizhi ya balwany babo ke yabo;

⁵³ Nakeba kusenda lubaji lwa kibaaba kyapelako kwikala ke mutwe: Kabiji Wa Mulukunwa Obe Ukangata Nsakwa Ya Balwanyani Banji. Ao ke—ke mulaye wawama.

⁵⁴ Pano, atweba bonse twayuka jije jishimikila, kapepo jitangai jikwabo, ne jikwabo, kimye pa kimye, ja kwa Abulahama, kabiji Lesa byo amwichile kufuma mu kyaalo kyanji, kabiji ne byo ajinga muntutu, kafwako nangwa kimo kyapusanako ne. Bino Lesa wamwichile ne kumulengela mulaye.

⁵⁵ Pano, Nasaka namba mumone mba awe mulaye ye alaile Lesa kwi Abulahama kechi wajingatu wa kwa Abulahama ne, bino wajinga wa ku lukunwa wanji ukalondela palutwe yanji.

Pano, bantu bavula baamba mba, “Oo, inge Najinga nobe Abulahama, inge Najinga apo Lesa po esambilenga ne amiwa ne—ne kupa luketekelo nobe byonka Aubile kwi Abulahama, Nanchi inge njina, Amiwa—Amiwa kine nakonsha kwikala na lwitabilo, Mulongo Branham, inge Najinga nabo, inge Lesa waambile kwi amiwa byonka byo Aubile Abulahama.” Bino uji na mulaye umo yeka Abulahama ye ajinga nanji, ko kuuba mba, inge wi Lukunwa wakwa Abulahama.

⁵⁶ Nanchi mwamba mba, “Bino, Mulongo Branham, Amiwa ne Ngentila. Amiwa kechi nakonsha kwikala na lukunwa wakwa Abulahama ne.”

⁵⁷ Awa Lukunwa wakwa Abulahama kechi wajinga lukunwa wa ku mubiji ne. Wajinga Lukunwa wa bumupashi, mambo awa mukanda wa kyokya kechi wajinga na kintu ne. Mulaye, Aye wamupaine mukanda kasa akyangye kwikalako ne. Bino wapainwe kwi aye mukanda kasa akyangye kwikalako ne, kabiji kechi kyajinga mambo akuuba mba wasembulwilwe ne kwikala mululayang’ano na Lesa muyewa musango ne. Ke mambo akuuba mba Abulahama waitabijile Lesa.

⁵⁸ Kabiji Kinembelo kyaamba, mba, “Umvwe twafwa mwi Kilishitu, twikala Lukunwa wakwa Abulahama.” Paulo waamba pa kikye, “Kabiji awa uji Muyudeya kechi ye Muyudeya ku mubiji ne, kana Muyudeya ku mupashi.” Onkao mambo, inge wasemwa ku Mupashi wakwa Lesa, “anweba mwi Lukunwa wakwa Abulahama, kabiji ba nswanyi pamo ne Abulahama monka mwaila mulaye.” Mwamona? Onkao mambo yense mulaye wakwa Lesa ye apaine kwi Abulahama ke obe, mambo mwayila bumupashi obewa wi Lukunwa wakwa Abulahama.

⁵⁹ Kabiji obewa wakila kwikala Muyudeya kukila byowafwainwa kwikala inge wasemwa mu mashi a Buyudeya, kabiji pano—kabiji pano waikala Muyudeya nkonko mu kyokya kipwilo, kabiji ke wakukana yuwe Mupashi Wazhila wawama ne Nkambo Yesu Kilishitu. Mwamona? Obewa wi wakila kwikala mu Yudeya, mambo obewa wi Muyudeya ao wasemekwa kufuma ku mulaye wa Mwiulu, ao Lesa ye apaine kwi Abulahama, kabiji Abulahama wikiswile ku lwitabilo, kabiji akya kyo amulengejile kwikala byo ajinga. Kukijishamo, Buyudeya ke lwabanotu, kabiji waikala, Muhebelu, kabiji ne bikwabotu byabyobyoy.

⁶⁰ Pano, bino umvwe wi abanyako obewa mwine ku bya panopantanda, obewa wapitaila pa yewa mulaini wa lwabano, kabiji waikala ke kang’enda mu ntanda ya bwenyi, ntanda iji nobe kechi waikalama kala ne, kufuma ku ntendekelo, na bantu bo wabula kukwatakanapo nabo kufuma ku ntendekelo, popo wikala Muyudeya wa bumupashi. Mambo, mujishindatu jimo ajo Abulahama, konka kulwitabilo, ko afumijile mu kyaalo kyanji, washile bantu banji, waile muntanda ya bwenyi na bantu benyi, washa bantu bobo, washa ntanda kunyuma yobe, washa balunda

nobe kunyuma kobe, baabukile mubushiya, kupita mu Mashi akwa Yesu Kilishitu, kabiji ke bakang'enda, na kukeba Muzhi, ao Tungi ne Mulenga ye Lesa, nobe Abulahama byo ajinga. Bakang'enda, kasa baji Nanji, kwikala mu matente, bipwilo, balunda bangikazhi ba mu Bumfumu bwa Mwiulu, baswanyi ba bintu byonse monka mwi Yesu Kilishitu. Mwamona? Twaabukila kubushiya, twaabanwa.

⁶¹ Pano, Abulahama, mulaye walayilwe kwi Abulahama kabiji ne Lukunwa wanji wa kumulondela panyuma. Pano, Lesa wapaine yuwe mulaye kwi Abulahama, ku Lukunwa wanji, wakwangata nsakwa ya balwanyi banji panyuma Ya kumweseka Abulahama, waesekele Abulahama. Pano, panyuma yakwesekwa, nanchi . . .

⁶² Abulahama wajinga waaluluka kala, byo twafwainwa kwikitela, kufuma ku buntushi ne kwiya kwi Lesa. Kabiji pano Lesa wamupele, nobe kiyukilo kya Mupashi Wazhila, mukanda. Pano, panyuma ya mukanda, popo kyaishile kimye kya kwesekwa.

⁶³ Ke kipasha kyawama bingi papo kya Kipwilo, kya kuuba mba, panyuma ya kupuluka, popo tupewa katetesho ka mulaye wa mukanda, ao uji kechi wa ku mubiji ne, kana wa ku Mupashi. Kabiji Mupashi Wazhila ye mukanda wetu. Ke mupenyi watwa wa kwa Lesa. Wabanya ne kuchibako kikoba kyabula mwingilo, kya muntanda, kwi atweba. Akyo Kyambo kya Lesa, kyatwisha kukila mampoko atwa-kubiji! Nanchi, mwamona, kyabwela jibiji, akya Kyambo kya Lesa kyo kintu Mupashi Wazhila kyo engijisha; kechi bisho ne, kechi madinominesheni ne. Pakuuba Kyambo kyo kitwabanya kufuma ku bintu bya muntanda. Kichibako milanguluko yetu ne bintu bikwabo, kabiji ne kwituzhijika atweba kwi Lesa.

⁶⁴ Yesu waambile mba, "Inge mwaikala mwi Amiwa, kabiji Kyambo Kyami mwi anweba." Abyo byo byo kiji. Nanchi, kechi kyambo kyenu ne. Ke Kyambo Kyanji. Nanchi, mwamona, "Inge mwaikala mwi Amiwa, kabiji ne Kyambo Kyami mwi anweba, mwakonsha kwipuzha kyonse kyo mwasaka." Uu-uu. Mwamona? Byokiji, kechi ubena kwamba kyambo kyobe ne. Obewa ubena kwamba Kyambo Kyanji.

⁶⁵ Nanchi pano Mupashi Wazhila Ye utola Kyambo kya Lesa kabiji ne kwitwabanya kufuma ku bibye bintu bya muntanda, monai, mukanda, kuchibako. Pano po upita mu kimye kya kwesekwa.

⁶⁶ Pano, Abulahama, panyuma ya kwita kufuma, mu ntanda ya bena Kalodeya, muzhi wa Ula, aye waikale mwenyi, ke kang'enda. Kabiji pano Lesa wamwichile, panyuma ya kushinikishiwa mba ukatwajijila na kusenda Lesa pa Kyambo Kyanji. Nanchi, Lesa byo aubile kyokya kimye, wa mupele kiyukilo, amba Wamuswa, kabiji Wamutwala ku mukanda.

Kabiji aye wa mutwajile ku mukanda Ishimela ne ba mu nzubo yanji.

⁶⁷ Kabiji pano mwamona, inge—umvwe mwaitwa, patanshi wafwainwa kupita mu lweseko, kumona kana kine wafwainwa kutwajijila kuya kulutwe. Kabiji apa bino Lesa wakupa Mupashi Wazhila, akyo ke kiyukilo kyakuuba mba Aye waitabizha lwitabilo lobe lo waamba mba uji nalo mwi Aye. Anweba pano mwandondela? Aye usa kwikiswa.

⁶⁸ Pano, Najikwambanga ku . . . Mwafwainwa kutanwa balongo bawawama ba ku Baptist baikala muno. Kabiji bonse bayuka mba Nafuma mu kipwilo kya Baptist. Naambilenga ku mulongo wami wa ku Baptist. Kabiji waambile kwi amiwa mba, “Mulongo Branham?” Aye wajinga Dokotala wa bya Bulesa, muntu wawama, Mwinakilishitu wakine. Aye waambile mba, “Bino, Mulongo Branham, kwepi ko mufumya lubatizhilo lwa Mupashi Wazhila kwikala kintu kyapusanako na lwitabilo mwi Kilishitu Yesu?”

Naambile mba, “Kyapusanako, mulongo wami wawama.”

⁶⁹ Aye waambile mba, “Kechi mwalanguluka mba umvwe wamutambula Kilishitu, watambula Mupashi Wazhila nenyi?”

⁷⁰ Naambile mba, “Byo kiji. Bino,” Naambile mba, “mwamona, obewa ubena kwambatu mba wamutambula Kilishitu, poso Aye wakitabizha kwikimona.”

⁷¹ Aye waambile mba, “Mulongo Branham, Abulahama waitabijile Lesa, kabiji kya mutelwe ke bololoke.”

⁷² Naambile mba, “Ee. Bino Lesa wamupele kiyukilo, amba Aye watambwile lwitabilo lwanji, byo Amupele katetesho ka mukanda, amba Aye waitabizhe lwitabilo lwanji.” Amena.

⁷³ Pano, inge twatambula Kilishitu kwikala Mupulushi wetu, nanchi, inge twaikala ba bukishika mu kyokyo, apo Lesa po etupa kiyukilo, amba Aye watambula lwitabilo lwetu mwi Kilishitu, kupichila mu kupana katetesho ka mukanda, ao ye Mupashi Wazhila. Ako ko katetesho ka mukanda. “Kechi mumufichishe pa muchima Mupashi Wazhila wakwa Lesa ne imo mo mwabikijilwe katetesho ka kufika ku Juba ja Bukuzhi bwenu.” Kechi ku mbung’eno ikwabo ne; kana ku Juba ja Bukuzhi bwenu. Abyo ibyo, Efisesa 4:30. Pano, abyo byotutambula Mupashi Wazhila.

⁷⁴ Pano, inge mwaamba mba, “Oo, Amiwa ne waitabila,” kabiji Lesa ukyangye kwimupa Mupashi Wazhila ne, Aye kechi wakiluyuka ne. Obewa ukishimunatu mba waitabila. Pakuuba luzhinauko lonse . . . Amiwa kechi mbena kwamba mba obewa kechi wi waitabila ne. Mu kibese kimo, obewa wi waitabila.

⁷⁵ Bino umvwe Lesa wakutala bulongo, obewa watalwa bulongo kwi Aye, nangwaa byonkabyo, kabiji Aye wakuyuka mba obewa wi mwana Wanji, kabiji Aye wayuka muchima obe,

kabiji Aye umona bukishika bobo, Aye wayuka mba bintu byonse byachibikako kwi obewa. Nanchi Aye ukubika katetesho ka mu Bufumu bwa Lesa, konka ku Mupashi Wazhila, na kushinikisha ku ntanda amba Aye waitabizha alwa lwitabilo lo wamba mba uji nolo mwi Aye. Pano mwikyumvwa?

⁷⁶ Pano, bukiji bukiji kufumatu popo, lweseko lwiya. “Yense mwaana wiya kwi Lesa wafwainwa kumanyikwa patanshi, ne kwesekwa.”

⁷⁷ Yesu, aku Utambula kuyula konse kwa Mupashi, pa mukola, kimye Yoano kyo Amubatizhe, ponkapotu diabola Wamutwajile mungyetu, kupita mu kimye kya kwesekwa. Pakuuba byo Asendele Kyambo kya Lesa ne kumushinda diabola, “Kyanembwa mba. Kyanembwa mba,” Aye wabwelele kasa enengezha mu mwingilo Wanji.

⁷⁸ Kabiji abyo Lesa byo byo aubile kwi Abulahama. Pano, Lesa, panyuma ya kumwita kufuma mu ntanda yanji, kabiji wi abenye aye mwine ku ntanda yanji, bantu banji, kabiji pano Lesa wamupele katetesho ka mukanda, apa mino wamupa ne mwaana. Apa bino popo ayile ku lweseko lwapelako, kufikatu ne pa kimye kya kupana bukitapisho mwananji Izaka. Kabiji Aye waambile mba, “Byo wabula kukanya mwanobe yenka umo, Nayuka mba obewa Watemwa.” Aye wamupele lweseko.

⁷⁹ Kabiji kufumatu ponkapa, nkondo yashijilwe, Aye waambile mba, “Kabiji Lukunwa obe ukangata nsakwa ya balwanyi banji.” Amena. Natemwa kyokyo. “UKangata nsakwa ya balwanyi banji.” Tusakufika ku kyokyo kyapelako mu bimye bicheche, inge Nkambo waswa. Pano Aye wataine kikye, Abulahama kwikala wakishika. Panyuma ya kumutana Abulahama kwikala wakishika, ipo po Amupele mulaye wakwangata nsakwa ya balwanyi.

⁸⁰ Pano apo, bimye byavula, apo atweba bavula ba Pentekosito po twaubila kilubo, ne kulanguluka mba, “Kyawama, Mupashi Wazhila waitulwilwa pe amiwa. Lukumo lwikale kwi Lesa! Abyo byo byonka byo Nafwainwa kwikala nabyo.” Ine, mwane. Obewa po ubena kutatulatu. Obewa, kechi pakyokyo kimye ne. Ke kwesekwa nkobe kabiji ne lweseko lobe.

⁸¹ Kijitu pamo nobe byo twatana mu—mu, monka mu—mu—mu Lulayang’ano Lwakala; kweseka, kwesekwa, kabiji ne kwikajikwa bwaana. Kwalulwabubana, kwikajikwa bu mwaana panyuma aye waikala kala mwaana, wasemekwa mu kisemi. Aye ke mwaana, nanchi wafwainwa kwesekwa ne kupita mulweseko, ne kufunjishiwa ku bafunjishi, kabiji ne kumona byo afwainwa kukoma. Kabiji pano waikajikwa kwesekena pamo, pepi nobe pamo, ne bashanji.

⁸² Pano abyo byo byo kiji ne leelo. Twaikala na myaka foote ya kwesekwa kwa Pentekositi, nangwa kukilapo, monai, kweseka kipwilo, kumona kana bakonsha kwimana, nangwa ine. Byo

mubena kumona . . . Kabiji, monai, apo ipo po Nekitambwila jibiji. Mukifulo kya kukwachijila ku musalabu ne ku Kyambo, ne kutwajijila kuya kulutwe, twikala bapasha ntanda, kubwela mu jije *jishinda*, nangwa kubwela ku *jije* jishinda, nangwa kulondela yuwe *musango*.

⁸³ Nobe byonka byo ng’amba kyakonsa ku bantu kimye kyonse mu byubilo bya bukatataka leelo, abo banabakazhi batenda suki yabo, kabiji—kabiji ne banabalume byo babena kuuba kabiji ne bintu byonse, kabiji bamvwala byakuvwala byatama ne bintutu bikwabo. Amiwa ntambula kujimbululwa kwabaya bingi. Bino kyo kika? Ke kweseka kupulusha kyokya kipwilo. Kibena kweseka kwibaleta *papo*, ku Kyambo kya Lesa, nangwatu ntanda yakonsha kwambaka pa Kikye. Ikalai na Kyambo kya Lesa. Amena. Mwamona? Mwamona?

⁸⁴ Kine kintu ke kino, nobe byo Najikwamba bufuku bwapita, ba Pentekosito babena kupembelela mwela mukatampe upumpa, bino bakakalwa kumvwa aja Jiwi jicheche. Mwamona? Kuuba mba, ke kintu kyatama kuba bibye bintu. Abo balanguluka mba, “Kikulutu mwela ubena kupumpa, kijitu bulongo.”

⁸⁵ Bino akyo kechi kya kebwire milanguluko yakwa ngauzhi ne. Mwela wapupilenga kechi wakatezhe ngauzhi Elaija mu lukelo ne. Bilulumo bikatampe ne kubyashabyasha, ne mvula mukatampe, kechi bya mukebwile ne, byonsetu. Pakuuba kya mukumisha kyajinga aja jiwi jajicheche, amba kintu kimo kibena kwamba mukachi moomwa. “Kyambo Kyami bo Bukine. Lekai kyambo kyonse kya muntu kikale kyabubela, kabiji Kyami kikale kyakine.” Akyo kyo kyakebwile ngauzhi. Mwamona?

⁸⁶ Kabiji kikyubiwatu ne pano. Akyo Kyambo kya Lesa kimye kyonse kikebula milanguluko ya bumupashi, mambo ke maana akwa Kilishitu aji mwi obewa, ao ayuka mba akya Kyambo kyakine.

⁸⁷ Kabiji wapita mu kimye kya kwesekwa. Kipwilo kipita mu kimye kya kwesekwa. Muntu umo umo upita mu kimye kya kwesekwa kasa akyangye kutambula nsakwa ya balwanyani ne. Abulahama wapichilemo. Kilishitu wapichilemo. Panyuma Kilishitu wayuzhiwamo na Mupashi Wazhila, akwa ku mukola wa Yondano, Aye wapichile mu kimye kyalweseko. Panyuma ya kwitwa kwakwa Abulahama, wabikwa muntanda amo mo afwaijilwe kwikala kang’enda, wabwela wapewa mukanda, kabiji Lesa wamukumenye, kimye pa kimye, nangwa byonkabyo wafwaijilwe kupita mu kimye kya kwesekwa. Yense lukunwa wakwa Abulahama uba kintutu kimo, Abulahama ne Lukunwa wanjii.

⁸⁸ Kabungwe, kipwilo, oene mambo kyo ntutaina tubungwe twetu twapona mulwendo lwato, ke mambo akuuba mba inge kafika mu lweseko. Ng’anyi kwesekwa? Kyambo kya Lesa. Ako

ko kwesekwa. Kyambo kya Lesa ko kwesekwa. Atweba tukooba kyaamba jibumba ja bantu, nangwa twauba kyaamba Lesa mba ubai? Alo lolupusano.

⁸⁹ Abyo byobyoyo kyaishile, moba akwa Dwight Moody, moba akwa Finney, Sankey, Knox, Calvin, Spurgeon, bonse bashala, aba bantu ba bumupashi, tubungwe twalondejile panyuma yabo. Banji na jibumba ja bantu kunyuma kokwa abo beya batwelamo, umo umo waitabila *kikye* ne *kyokya*, kabiji ne kubikapo bicheche *papo*, kabiji ne kufumyapo bicheche *papo*, kabiji ne kubikapo bicheche *papo*, poso pakupezhako balengamo kabungwe kufuma mu kyokya.

⁹⁰ Kabiji umvwe bauba byobyoyo, waitabila kyakine kine, Lesa wiya watolapo umo mucheche, muntu wikepesha, waonauna kyokya kintu. Ibyo. Kimye kyonse wikyuba. Lesa kechi upipula ne. Wikyonauna akya kintu bipimvwa bipimvwa, bamo bantu baji na maana-abu mupashi bekekala na Kyambo.

⁹¹ Lekai ne mubuule. Amiwa nji na kalata ku nzubo, ya ku kipwilo kimo kyawama bingi, kabiungwe kakatampe mu ndoonda ya Pentekosito. Awa mwanamukazhi kamulanda walajika-muchima wandembejile kalata. Kabiji aye waambile mba, “Mulongo Branham, Namvwala suki yalepa kabiji ne kyunsu ku jikoshi jami.” Aye waambile mba, “Kabiji aye... Balume bami bekitemenwe.” Kabiji aye waambile mba, “Atweba twafumine mu muzhi amo mwajinga kipwilo kya bumupashi, ne kuya mu kikye kipwilo kikatampe, kipwilo kitanshi kya muzhi.” Kabiji waambile mba, “Byo twafikile momwa, bonse banyenga ba ki Pentekosito bajinga batenda suki yabo.” Kabiji waambile mba, “Bandondejile amiwa pa kikye. Naambile mba, ‘Ine, ine. Naketekela Baibolo waamba mba kechi twafwainwa kuuba kyokyo ne; kyaikala kyabula musingi pakuba kyokyo.’” Kabiji nanchi aye waambile mba, “Kabiji balamine...” Ba musekelenga, kwamba mba, “‘Aee, kyobe—kyobe kyusu kibena kupwa ku jikoshi, byobe byashalako,’ ne byose byonkabya. Kabiji kyakwachile mulme wami, mujishinda jakuuba, poso wakajikizha kutenda suki yami.” Kabiji waambile mba, “Nazhatwa, kufumatu ku kyokya kimye.”

⁹² Kilangulukaipo, kipwilo kya Pentekosito akyo kyafwainwa kwimana kulubaji lwa Kyambo kya Lesa! Ako kabungwe kobe ko kakutwala. Ibyo. Bakakalwa kumvwa aja Jiwi jicheche ja Kyambo, jibeta ku bya bukine. Bonse babena kuteleka ku lubesha mukatampe upumpa, kabiji ne kubijika kwabaya ne kuzha, na kwamba mba baji na bulume. Akyo kijitu bulongo. Naketekela mu kyokyo, ne akyo. Bino, mulongo, inge wakonsha kuzha ne kubijika, kabiji wabwela waaluluka ne kukana Kyambo kya Lesa, kabiji ne kwikala pamo nobe ntanda, pajipo kintu kimo kyatama pantu pamo. Ibyo.

⁹³ Aye Mupashi wakwa Lesa wikila, aja Jiwi jicheche, kabiji

jakutangijila kuya ku Kalvali, ako nkotwafwa, kabiji bumi bwetu bwafiwa mwi Lesa kupichila mwi Kilishitu, kabiji ne kubikwa katetesho ka Mupashi Wazhila. Nanchi, akya Kyambo bunke bwakyo kyo kikala momwa. “Nanchi umvwe waikala mwi Amiwa, kabiji Kyambo Kyami mwi obewa, ipuzhai kyonse kyomukeba kabiji kikapewa kwi anweba.” Alo lo lupusano.

⁹⁴ Naketekela kechi Mweke nobe ubena kukaya ne. Inge Amiwa byonji, Ami—Ami—Ami kechi ne kiyuka ne. Na—Naketekela mba Kyambo kya Lesa kya Bukine, kabiji Kyafwainwa kwikala monka muno. Kabiji umvwe Kyaikala mumwe, Kikemweshwa akyo kine pangye. Kyafwainwa kuuba! Bumi boobe, ndengelo yobe yonse, ikekala yapusanako.

⁹⁵ Nanchi kimye Lesa kyo apele Abulahama kwesekwa, aye wapichilemo, paseti yense wapwijijika. Kabiji wafwainwa . . .

⁹⁶ Lesa kechi wakonsha kupana kwesekwa ku kabungwe ne, mambo byonse byamvwanganakanatu. Lesa kechi wingila mu joja jishinda na kabungwe ne. Aye kechi wingila na byaalo bya ba Ngentila ne. “Aye watolele bantu kufuma mu Bangetila.” Isalela, Aye watolele kyaalo. Pakuuba, ba mu ba Ngentila, “Aye watolele bantu kufuma mu Bangetila na mambo a Jizhina Janji.” Nanchi, mwamona, kechi ke tubung- . . . Kechi kabungwe ne. Ke muntu bunke Ye afumyamo mu Bangetila.

⁹⁷ Kabiji umvwe kwesekwa kwaiya, mwakonsha kumona kimweka? Twalupukile kufuma mu lubingisho. Twatambwile lubatizhilo lwa Mupashi Wazhila mu ng’endo ya pentekosito. Bino umvwe kyafika pa kimye kya kwesekwa, ke kusenda bafunda masukuulu, bakeba kwikala nobe ntanda, nobe byonka byokyajinga mu moba a ng’endo ya kwa Wesley ne bonsetu bashala. Baya ku sukuulu. Abo—abo bafunda sayaasi. Kabiji bafunda byonse bintu bikwabo byendela pamo na kufunda. Kabiji beseka kufunda saikoloji. “Ke kintutu kyawaina, kyawama, kwamba kikye *ne*. Balekai bobo *kikye* ne *kyokya*. Mambo kikooba . . .” Mwamona, mubena kunungapo ne kushimika. Kyo—kyo—kyo waimanapo kyatama. Nkebelo yobe yatama. Obewa ubena kushimika kabungwe mukifulo kya kushimika Kalvali. Wakonsha kushimika byepi ku Kalvali, inge kechi waiya kupichila mu jishinda ja Kyambo ne?

⁹⁸ “Mambo atweba twaomvwewa mu meema a mu Kyambo.” “Ikalai mwi Amiwa ne Byambo Byami mwi anweba, nanchi ipuzhai kyonse kyomukeba.”

⁹⁹ Apo potumwena kushindwa kwa ng’endo ya Pentekosito, mambo bafumako ku Kyambo. Akya Kyambo kikamba kintu kimo; abo bakeseka kulenga kabungwe kutwelamo pantu pamo. Kabiji bakenda kufuma mu kyokya Kyambo, ne kwikisenda mukachi ya kabungwe. Kabiji mwamonako kiya? Kijitu pamo nobe bipwilo bikwabo byashala. Bino pano twazha ne kubijika, ne kwamba mujimi, kabiji ne kutolauka peulu-ne-

panshi, byonse bijitu bulongo. Kabungwe kabo kajitu bulongo. Naketekela mba Nelumbululapo bulongo. Bino kine kintu ke kino, aja Jiwi jicheche ja Kyambo kasa jibena kwamba. Byokiji.

¹⁰⁰ Inge mwapita mu lweseko. Lesa ubena kwimwesekwa nobe byonka byo Aubile Abulahama. Aye weseka Lukunwa wa Abulahama, wakulondela panyuma yanji. Kabiji pano, ene mambo o tubujila kutambula nsakwa ya balwanyi, mambo akuuba mba muji byavula mukachi ketu, ke mambo akuuba mba kechi twakonsha kwimana ku lweseko ne. Kabiji lekai ne mubuuleko kintu kimo, lweseko lwa Kyambo lujitu bulongo.

¹⁰¹ Ene mambo kyo twabujila kwikala nakyō, kabiji kechi tutekela nakyō ne...mu kabungwe. Naketekela mba Pentekositi uji na kabungwe kawama. Bantu bamo bawama bingi Amiwa...baji...bekala panopantanda, batanwa mukachi ka—kabungwe.

¹⁰² Ba Assemblies of God, Njina balunda momwa. Ami! Mulongo monkamwa mu Indiana, Amiwa mbena kuya, na kwikala na mbung'eno, Naketekela, kuya, ponkapotu. Mulongo Roy Weed, aye ke muntu wa pa kambi ya kibuji kya Indiana. Naketekela mba ke muntu wa bulesa. Nangwa byonkabyo, aye ke muntu wa pa kambi wa ba Assemblies of God.

¹⁰³ Ba foursquare, oo, ami, baanga! Ralph McPherson ne bakwabotu bavula ba mubooba balongo, abo ke bantu ba bulesa, kafwako nangwa kimo pa bumi bwabo ne. Ke bantu bawama bingi.

¹⁰⁴ Amwa mu ba Oneness, byo betela abo bene mba, Oneness. Nangwa, pano, Amiwa kechi nalanguluka...Abo bekitela mba kipwilo kya Jizhina ja Yesu. Jack Moore, ke kutelatu umo kufuma mu...Muji maaduleendi, bantu bawama, banabalume bawama, banabalume ba bulesa.

¹⁰⁵ Bino kine kintu, mulongo, ke kino, inge wakwachijila ku konka kabungwe. Mwamona? Lesa usenda atwa tubungwe, kabiji—kabiji tonse twapona. Talai pe ato, ntanda ibena kutwelamo. Talai pa banabakazhi babo. Talai pa banabalume babo. Talai pa musango wabo. Nakonsha kwimutongwela, bantu ba ku Assemblies of God baji ba nkwasho mu bije byabo, abo basongolwa jibiji nangwa bimye bisatu, basapwishi kasa babena kutwajijila. Banabakazhi baji na suki yabo yatendwa, bamvwala tuputula, kwipetapeta, bino kasa bambatu mba baji na Mupashi Wazhila, baimenatu pa bukamonyi bwa kwamba mujimi, nangwa kukilauka peulu-ne-panshi, nangwa kubijika.

¹⁰⁶ Abo bakakalwa aja Jiwi jajicheche ja Kyambo. Akyā Kyambo kikulama obewa kasa waimana ku musalabu. Apo po kyaikala. Oene mambo kyo twabujila kwikala na bangauzhi bakishika mu kipwilo leelo, nobe Agambasa.

¹⁰⁷ Oene mambo, kipwilo leelo, abo—abo kechi baji na munema wa kwamba mujimi inge muntu umo waamba ne, mambo abo

baumvwa byavula byabubela ne bya kuuba-uba, poso babula kuyuka kyepe kyaoloka ne kyatama kijimo.

108 Byakulumbulula bya kufwanyikizhatu, muntu umo kwamba kintu kimo mambotu aye watundaikwa. Ako kechi ko kulumbulula ne. Byakulumbulula; kechi mungu umo waimana na kwamba mu jimi, ne mukwabo waimana mu mamineti achechetu wabwela walumbulula byo a amba. Umvwe umo ubena kwamba, mukwabo ubena kulumbulula ponkapotu, na kwamba kyambo pa kyambo, ndondolwelo imotu, bintu byonse bijitu pamo. *Awe* muntu wafwainwa kwaula, bino kechi kokulumbulula ne. Bamo mwi abo, *awe* musango wa jiji jibena kupana kintu kimo, *aje* kunyuma jibena kupana kintu kingi. Kabiji bamo baamba byambo jikumi, mukwabo waamba byambo fiifite kunyuma yanji, bya kulumbulula.

109 *Kulumbulula* kyalumbula mba “kwamba, kyambo-pa-kyambo.” Inge kyo Kyambo kya Lesa, kyafwainwa kwiya, kyambo pa kyambo; mulaini pa mulaini, mulaini pa mulaini. Abye Kyambo byo kyafwainwa kwiiya.

110 Pano byo twamonapo? Ke byabubela byavula bingi! Kabiji baubile kyokyo, pa kuuba mba, mukifulo kyakwikala na Kyambo, babikamo kyokya. Ponkapotu muntu umvwe wauba byobyoy, bamutelele mba aye ke Pentekosito. Kabiji mwayuka kimweka.

111 Inge kwesekwa kwaiya, kimye kya lweseko, apa ponka Lukunwa utatula, umwesa Lukunwa wepi kabiji ne wabula ne. Pano, nangwa kikale byepi, Abulahama waikele na Kyambo, mulaye.

112 Pakuuba leelo kabungwe kechi kakonsha kuuba kyokyo ne. Kabiji anweba bamo balongo bawama mutanwa kututwe tubungwe, wapachika nabo kimye kimo, wayukatu ko waya. Baanga ba mwi anweba?

113 Amiwa kechi mbena kwamba mba, mu kino kishimikwa ne, bino baanga batanwa mu kufunjisha kwami, baanga baikala ne amiwa, ne kwamba mba, “Mulongo Branham, twayuka mba abo bo Bukine. Bino inge twapangwa muno, kika kyo tusakuba?”

114 Mulongo, kika kyo tusakuuuba? Kwachijilai ku Kalvali, kwachijilai ku mulaye, kwachijilai ku musalabo, nangwa kikale byepi.

115 Kabiji monkamwa, baji na bantu bawama bingi. Mwamona? Bino kyo Mbena kweseka kuuba, ke kwamba, akya kyafwainwa kukakalwa. Kimye kyonse kyakakalwa kabiji kimye kyonse kika kakalwa. Bino kiji, nangwa wakakalwa nangwa ne, na Lesa, lamai Kyambo kya Lesa ne mulaye Wanji, patanshi. Obewa ukesekwa kwi Akyo.

116 Obewa ukafwachika bipepala, amba ukooba *bibye* nangwa kuuba *byobya*. Ne kwimenatu Kyambo, obewa ukekifwachika.

Abyo ibyo. Mu muchima obe, wayuka mba kyatama. Aja ke Jiwi jicheche jibena kwamba, akya Kyambo. Kechi kyakukumya ne twakakalwa kuya kulutwe, mambo kintu kimo kyaubiwa. Obewa wi abanya obewa mwine kufuma ku joja Jiwi ja jicheche. Obewa walupukamo bukiji bukiji. Lesa wakwichilenga, pakuuba obewa wanyemako bukiji bukiji, mambo akuuba mba bilulumo byavuma, kubeshabesha kwamweka, mitumba yasukena.

¹¹⁷ Kechi kyamwendeshe Elaija ne, awa ngauzhi. Aye wakebelenga joja Jiwi, patanshi. Aye waambile mba, “Amiwa nsakushika ponkapo.”

¹¹⁸ Bavula bingi leelo, batatwile, mpwijilo ya lubuko, kupashang’anya kwa ku mubiji, ne bintu byonse, kabiji ne ng’umvino ya ku mubiji yabulamo mu Kyambo kya Lesa ne. Abyo ibyo. Kyo kika? Twafwainwa kwimba yewa lwimbo, “Aba bapembelela pe Nkambo. Lekai kepeshe bwitote bwami ne kutela pa Jizhina Jenu. Lekai pembelele, Nkambo, poso Ng’umvwe joja Jiwi jicheche.” Kabiji aja Jiwi jikekala ke Jiwi ja Kyanembwa. Jikambatu mwayila Kyambo. Amena. Kijitu bulongo.

¹¹⁹ Wataine, Abulahama panyuma ya kubikwa, waitwa, wa abenwe kufuma ku batemwe banji, kufuma ku kisemi kyanji, kufuma ku nzubo yanji, ku balunda nanji, ne kuya mu ntanda ya bwenyi. Ko kulwitabilo ko aubijile kyokyo. Nanchi, mambo wikyubile, Lesa wamupele mukanda, kushinikisha mba wajinga mwaana Lesa, amba aye waketekejile mwi Aye mambo waketekejile mulaye. Nangwa byonkabyo, aye kechi wakonsheshe ne, kechi wikimwenejile ku mubiji ne, bino aye washimwine mba, “Kintu kyonse kyapusanako na Kyambo kya Lesa ke kyabubela.” Nangwatu wikale na bukamonyi byepi, ki kijitu kya bubela.

¹²⁰ Amiwa nashikwa kwamba kikye, nangwa byonkabyo nsakuuba. Talai. Kabiji inge watola banabakazhi, Nsakwikyamba na mambo akintu kimo kimweka, bakonsha kumona, aba baamba mba baji na Mupashi Wazhila, kabiji kechi bafikilamotu bulongo ku—kuleka suki yabo yakoma, nishi kujipo kintu kimo kyatama pantu pamo. Mwanamukazhi umvwala kya kuvwala kyapasha kya mwanamulume, ne kwi kimvwala, Baibolo kasa waamba mba, “Ke kyabunya ku—kwi Lesa, mwanamukazhi kumvwala kyakuvwala kyapashako kya mwanamulume.” Kabiji pano ke witumbijike mba njina Mupashi Wazhila ne kuuba kyokyo nyi?

¹²¹ Naambile pakyokyo juba jimo ku Oregon. Kwajinga mwanamukazhi umo wanembele kalata ikatampe. Aye waambile mba, “Mulongo Branham, uji na mwingilo wawama bingi, bino kine ubena kumonauna.” Aye waambile mba, “Pano, pano nga . . .” Waambile mba, “Mvwala ofoloshi kimye kyonse.”

Waambile mba, “Pano ibyepi kuya mu bujimi nakutola bimo—bimo mu bujimi, kasa wamvwala ndeleshi. Kechi mwalanguluka mba kyakonsha kumweka kuwama kumvwala ofoloshi kukila byo kyafwainwa kwikala, nangwa makwelelo, kiji kyonse byo kiji, kukila kumvwala ndeleshi?” Kabiji waambile mba, “Talai, Amiwa ngya mu mitumba na bansongwalume kimye kyobaya na kufunga bang’ombe, kabiji,” waambile mba, “Ntwela mu mampuzha muji-mbwibwi.” Waambile mba, “Pano, na—na ndeleshi, bakonsha kuja. Na ofoloshi kechi bakatazha ne.”

¹²² Naambile mba, “Akyo kechi kyanema kukila masuku alengwa ku kivule kya zolo wafwa na zala ne. Lusa! Kechi kijipo na Kyambo kimo kya Lesa pa kyokyo ne. Ayo ke milanguluko yobe.”

¹²³ Lesa waambile mba, “Lekai kyambo kyonse kikale kyabubela, kabiji Kyanji kikale kya kine.” Bakazhi bami bamvwala ndeleshi. Ne aye utola mu bujimi. Aye kechi uji na lukatazho pa kyokyo ne. Kabiji, nangwa byonkabyo, mwanamukazhi kechi uji na mwingilo wa kwingila na jibumba ja banabalume kokwa ne, kufunga bang’ombe, nangwa byonkabyo. Aye wafwainwa kwikala mu kikini muji lubaji lwanji. Abo ibyo.

¹²⁴ Abo babena kwesekatu kumona mwakunyemena, bino kafwako nangwa kimo ne. Kyambo kya Lesa kijitu patoka, kabiji mwanamukazhi wasemwa ku Mupashi wakwa Lesa wakonsha . . . Kabiji mwanamulume wasemwa ku Mupashi wakwa Lesa kechi wakonsha kuleka mukazhi wani kuuba byubilo biji byobya ne. Pano Aye waambile mbaka? “Aye watenda suki yanji, walengulula mutwe wani.” Kabiji mulume wani waikala ke mutwe wani. Waikala wabula mushingi.

¹²⁵ Kyangwamina kuzhindama. Kijitu bulongo. Bino, monai, monai, akyo kyafikilamo. Mwayuka kyo Mbena kwambapo.

¹²⁶ Amiwa kechi naamba kyokyo na mambo abushikwe ne. Inge Naamba kyokyo kupichila mu kichima, Lesa ubilai lusa pa muchima wami wa bundengamambo; lekai mfukame panshi papo pa kitapisho, ne kulapila.

¹²⁷ Amiwa mbena kwikyamba mambo, balunda, Nemutemwa anweba. Kabiji Mbena kweseka kwimubula bya bukine, kabiji akyo ke Kyambo kya Lesa. Twafwainwa kumvwa aja Jiwi jicheche ja Lesa, ja kufika pa kipimo kya Kyambo. Tubena kupita mu kimye kya kwesekwa. Aleluya!

¹²⁸ Bushe mwavuluka mba panyuma ya kwiya kimye kya kwesekwa, akwa kufunjisha kwa yewa mwaana wasemekelwe mu kisemi kya dinominesheni? Inge washinda lweseko ne kwimana na kukabila kwa bashanji, nanchi awa nsongwalume bamufumisheko ne kumumvwika kivwalo, kabiji kwaikala kusekelela. Kabiji awa nsongwalume wabikilwe mu kisemi akya kyo asemekelwemo.

129 Alo lolukatazho luji na ba Pentekosito bentu leelo. Abo batolokatu *papo* ne *popa*, kabiji tubungwe twetu twibandoozela mu *jije* jishinda kabiji ne *joja* jishinda. Abo kechi bekala na Kyambo ne.

130 Inge mwaikala na Kyambo, nishi Lesa, byo amona mba, “Inge waikala mwi Amiwa, kabiji ne Kyambo Kyami mwi anweba,” Kyanji, Aye kechi wakonsha Kwikikana ne, Ke Kyambo Kyanji. Nanchi kukekala kimye, kimye kimo, inge wafumishiwamo ne kukubika kulubaji lumo, kabiji ne kupewa kintu kimo kituntulu, aleluya, bulume bwa Lesa Wabulume bonse.

131 Akyo, Lesa ubena kupembelela baana Banji, bino kechi bakonsha kwikala mundonda ne, umvwe bafika ku kyokya kimye kya kwesekwa. Musakwikitambula nyi? “Kyawama, kipwilo kikandupula pangye.” Kijitu bulongo. Abyo byobyoyo kiji. Nanchi, yanga. Ao kechi ye Lukunwa wakwa Abulahama ne. Lukunwa wakwa Abulahama kechi uba byobyoyo byubilo ne.

132 Lukunwa wakwa Abulahama! Pano, Amiwa kechi nasakamana ne nangwa kwikale kyapusanako na Abulahama, aye waikaletu bulongo na kyokya Kyambo kya mulaye, waikaletu bulongo nakyo. Nangwatu Sala eye byepi, bantu bakwabo baiya, bapusanko baiya, bintu byonse, aye wikibajile nobe kechi byo kiji ne. Aye watajile, waketekejile mba wakonsha kumona mulaye, mambo Lesa wa mulailekyo, kabiji abyoyo byo kyajinga. Kyajinga Kyambo kya Lesa, kyaikale bulongo mwi aye.

133 Pano popo amupele alwa lweseko lwapelako. “Amiwa nkamupa bibese bibiji, ne kumweseka.” Pano, aye waikala kala na mwaana. Aye wamona mba uji nayewa. “Bino pano Amiwa kamubula mba, ‘Nsenda yewa mwaana ukamwipaye.’ Kabiji lekai yewa mwaana, inge wamona. . . Bushe ukepaya yewa mwaana nyi? Amiwa nsakumweseka pano.”

134 Abulahama, wakine ku Kyambo! Byepi, inge watambula mulaye, ukekikanya byepi akya kintu?

135 “Mwepi—mwepi mo ukeekela—mwepi mo waketekela kwikala shanja mikoka ya bantu, kabiji pano uji na myaka aduleendi fifitiini?” Mucheche Izaka, pepi nobe fotiini, myaka fifitiini. “Ukekala byepi shanja mikoka ya bantu byo uji na myaka aduleendi fifitiini, uno ye yenka mwaana obe, kabiji ubena konauna bukamonyi bonka bo uji nabo?” Amena.

136 “Pano Nsakuba byepi inge Nafuma mu kabungwe kami? Pano Amiwa kooba byepi inge Nauba *kikye?*” Oo, telekai ku joja Jiwi jicheche ne kwiya ku Kyambo, Kyambo.

137 Mwaamba mba, “Naumvwine jiwi jibena kumbula *kikye.*” Inge kyapusanako na Kyambo, kechi kyajinga Jiwi jakwa Lesa ne. Jiwi jakwa Lesa jiya ku Kyambo.

138 Nanchi Abulahama waendele kuya konka ku Jiwi, kabiji jazhindama, Jiwi jicheche ja Lesa, ku Kyambo kya Lesa, kyafwainwa kusenda bumi bwa mwaana wanji mwine.

139 Aye waambile mba, “Kanya kuboko kobe, Abulahama. Nayuka mba obewa watemwa Amiwa pano. Kabiji bonse bakakulondela panyuma, alelula, bonse bakakulondela panyuma, aba baswa kusenda Kyambo Kyami, bakekala Lukunwa obe, kabiji bakangata nsakwa ya balwanyi.”

140 Nanchi inge Najinga na kimye kya kwimubulapo kintu kimo kyamwekele moba acheche apitapo, monai, kya byamwekele. Oo, ami!

141 “Bakangata nsakwa ya balwanyi; Lukunwa wakukulondela panyuma yobe. Abulahama, ukakupesha ukapeshiwa, kabiji yense ukakufinga ukekala wafingwa.” Yesu waambile mba, “Kyakuwamina ku kukashila jibwe peshingo yobe, ne ku kutaya pa kalunga kazhika.”

142 Kabiji atwe tubungwe tukaana baabo bantu ba bulesa, mambo batola lubaji lwa Bukine, Kyambo, ne Mupashi ne bulume bwakwa Lesa, ne kwikala na Kyambo, mwamona kyamwekele nyi? Waloba mu kalunga kakulubako.

143 “Kyawama bakukashila jibwe peshingo yobe, ne kukutaya pa kalunga kazhika, kukila kututwisha umo wa baabo Bashingwa manyi.” Bobang’anyi? Lukunwa wa kwa Abulahama waikala na Kyambo kya mulaye.

144 Bipwilo byetu bimo bibena kufika pa kifulo kya kukana, abo bakana lubuko lwa Bulesa, abo kechi bakeba kikyeye mu kipwilo kyabo ne. Abyo ibyo. Tubungwe twetu twa ki Pentekosito kechi tukeba kutwajijila kwikala mu byalubuko lwa Bulesa ne. Kyo kika? Kechi mwamona diabola byo aingila ne? Aye watwela momwa ne kwamba bintu byabubela bya musango yewa. Kabiji ke bantu bafundatu balanguluka mba ba bumupashi, kabiji batala pa kyokyo, ne kwamba mba, “Talai pa *yewa* umo. Talai pa *yewa* umo.” Amiwa kechi mbena kutala pa kyokya ne.

145 Inge obewa wi Lukunwa wakwa Abulahama, obewa ukatala ku mulaye wakwa Lesa, byaambile Lesa mba ubai pa kikyeye. Byokiji. Lukunwa wakwa Abulahama, tutala ku mulaye. Amiwa kechi nasakamana baanga baji *kululwe* lubaji kabiji baanga baji *kulolwa* lubaji. Mulaye waikalatu wa kine.

146 Mwafwainwa kupita mukokwa kwesekwa. Mwamona? Ee. Abulahama, patanshi waesekelwe, bino apa wabikwa katetesho, apa bino wapewa mulaye wa kuuba mba “ba mu Lukunwa wanji bakangata nsakwa ya balwanyi.” Natemwa kyokyo. Nanchi, batambwile mansakwa a balwanyi baabo panyuma ya kwesekwa.

147 Kine kintu ke kino, kechi twakonsha kwimana ku bya kwesekwa ne. Ao oene mambo tubungwe twetu kechi twakonsha

kushinda meseko ne. Kechi kyaswa muchima wa kwa Lesa ne. Kiji, kyapeshiwa kwi Lesa, bino kechi kyo kyaswa muchima wa kwa Lesa ne. Mambo, monai, muji na jibumba ja bantu muno baji na milanguluko yavula, kabiji beileta pamo ne kusalululapo yakila kuwama. Bamo mwiabo baamba mba, “Awe ke muntu mukatampe. Obewa kechi wakonsha kukana kyambo kyanji ne.” Kyawama, ajo jo jishindatu jimo kipwilo kya Katolika byo kyabungizhiwa, kintutu kimo, pa jibumba ja baitabila bafunda. Mwayila bumuntu, abo batalako ku kikye, ne kwi kiswisha moka muyila bimye. Anweba kuuba mwikyuba ne. Bintu byonse ke bya bubela kanatu Kyambo kya Lesa.

¹⁴⁸ Abulahama kechi watajile pa kintu kimo ne kanatu mulaye wakwa Lesa. Nangwatu kikale byepi, waikela na mulaye wakwa Lesa.

¹⁴⁹ Nanchi oene mambo kyo twabujila kutanapo bavula. Kabungwe kechi kakonsha kutambula nsakwa ya balwanyani ne. Muji milanguluko yavula yabula kulumbuluka momwa.

¹⁵⁰ Lesa wafwainwa kutola muntu bunke bwanji, waangata nsakwa ya balwanyani. Mwakonsha kwikyuba inge mubena kukeba. Ee, mwane.

¹⁵¹ Twayai twesekepo bacheche, pa mamineti acheche, mumone kana bajinga mu Kinembelo.

¹⁵² Pano, kwajinga kimye kimo amwa mu Babilona byo kwajinga ki—kipasha kyaimikilwe, kyaesakana pamo nobe kipwilo kya Katolika, kabiji bonse babujile kufukamina akya kipasha bafwainwa kusokwa mu kisha kya mujilo. Pano, kwajinga kubekya, kana bafwainwa kwikala, inge Lesa waamba mba, “Kechi ukekala na ba lesa bakwabo ku meso Ami ne, nangwa kulenga kipasha kya kintu kiji kyonse ne.” Abyo Lesa byobyoyo aambile. Kubekya kwafikile.

¹⁵³ Bonse bena Isalela baponene ponkapa. Kabiji ntolopita byo yavumine, kabiji ne—ne masese avumine, kabiji ne—ne mitolilo yavumine, kika, bonse baponejile panshi ku meso akikye kipasha.

¹⁵⁴ Bino kwajinga basatu ba mwiabo baambile mba, “Kafwako kyo wakonsha kuuba ne.” Baumvwine aja Jiwi jicheche, kabiji baikele mu mulaini na Kyambo. Baubile byepi? Baikele na Kyambo.

¹⁵⁵ Kabiji pa kupwisha, abo—abo—abo baambile mba, “Inge kechi mwakonsha kwikyuba ne... Tusakwimupa kimye kikwabo, nangwa ne tusakwimutaya mu kisha kya mujilo.”

¹⁵⁶ Baambile mba, “Lesa Wetu wakonsha kwitupokolola kukisha kya mujilo.” [Kafwapo bijipo pa tepu ne—Waku.] “Bino, nangwa byonkabyo, tukekala na Kyambo.”

¹⁵⁷ Pano, mulongo, pano ngaanweba? “Nsakuba Byepi, Mulongo Branham?” Ikala na Kyambo. Ikalai na mulaye. “Kipwilo kyami

kikafumako kwi amiwa.” Ikalai na mulaye. Abo bakakepana, bakapita juba jimo, nangwa byonkabyo. Bino, Lesa kechi wakonsha ne. Ikala na mulaye. “Kyawama, Nemubula, ba kapangamo.” Ikalai na mulaye, kijitu pamo. Anweba ikalaitu na mulaye. Pano, inge mwakonsha kwikala na mulaye ne kwikala monka, ne kwikala nanji bulongo.

¹⁵⁸ Lumvwang’ano lwa bupopweshi na muntu yense. Bino pano papo, pano, kechi mu kashinda mu jishinda jiji jonse ne kanatu na lumvwang’ano lwa bupopweshi na muntu yense. Wafwainwa kwikyuba. Pano, inge bafika pakifulo kyatama, booba byubilo byatama, nanchi fumako ku kyokyo. Abyo ibyo. Kechi muye mu mpuzha ya mulwanyani ne. Bino kikulutu ubena kweseka kuleta mulongo obe, akyo kyapusanako. Mwamona?

¹⁵⁹ Pano monai, bino anweba kechi mukashindapo milanguluko ya kabungwe ne, muntu umo, ine, mwane, inge, babika mizhilo yabo, “Twaketekela *kikye*,” kwapwa. Inge mwakonsha kunemba lufunjisho lweni, “Twaketekela *kikye*,” kwimanako, kyakonsha kwikala kyapusanako. Period kyalumbulula mba, “Twaketekela *kikye*, kabiji wafwainwa kwiya ku *kikye* ne kufwachika kikye kipepala, nangwa byo byonka byo kiji.”

¹⁶⁰ Bino inge waamba mba, “Twaketekela *kikye*,” kaanya, “kubikapo ne byotwafwainwa kufunda kufuma kwi Lesa. Atweba twanshikulwa ku Mupashi Wazhila,” pano obewa ubena kuya, mulongo. Ee. Akyo kisakwikala kyapusanako pano.

¹⁶¹ Bino, mwamona, inge mwikinemba na bimye, kabiji Lesa upana kintu kikwabo kyaiyapo, kishinikisha kwikala Kyambo Kyanji, kya Bukine, kuuba waenda ne, mambo ke “kimye.” Akyo kikipwisha. Apo ipo bena Luther po bafwijile. Apo ipo ba Methodist po bafwijile. Apo ipo ba Baptist po bafwijile. Apo ipo ba Presbyterian po bafwijile. Kabiji apo ipo ba Pentekosito po babena kufwila. Abyo ibyo. Abyo ibyo. Abo bafwijile ponkapa, talai, mambo ke—kyanembwa kala. Kechi pajipo kyo—kyo wafwainwa kubikapo pa kikye ne nangwa kufumyako ne. Kiji—kiji konka. Alo lo lufunjisho lobe.

¹⁶² Benaluther kechi bakonsha kuswa kutokeshiwa ne. Ine, mwane. Aye waambile mba, “Baoloka bakekela ku lwitabilo.” Kechi Martin Luther ne; pakuuba aja jibumba ja mulondejile. Abyo ibyo.

¹⁶³ Kechi John Wesley ne; pakuuba jibumba ja mulondejilenga. Abyo ibyo.

Kechi Calvin ne; pakuuba jibumba ja mulondejilenga.

¹⁶⁴ Kechi John Smith wa kipwilo kya Baptist ne, ao walombelenga bingi, pa kimye kya bufuku, poso meso anji avimba waleka ne kumona, mambotu a kipwilo kyanji; kabiji mukazhi wanji wamutangijila ne ku mujisha na mujisho, ku tebulu. Kechi aye ne; pakuuba aje jibumba ja ba Baptist jimulondela, kabungwe kaishile kunyuma yanji.

Kechi Alexander Campbell ne; pakuuba aba ba mulondejile.

¹⁶⁵ Kechi ng'endo ya ki pentekosito pa ntendekelo ne, abo bajinga na bintu byonse pamo, kabiji bajinga nabupopweshi na muntu yense; pakuuba mabumba ayishile ne kwamba mba, "Ine. Tuji *bibye*, kabiji tuji *bibye*. Kabiji *abye* ke makatazho, kabiji byo byobyo!" ("Kwiabanya abo bene, ne kumweka nobe kechi baji na Lwitabilo ne.") Ibyo. Abyo byo kyaubile. Akyo kyo kintu kyatama. Amena. Naumvwa bupopweshi, lukeelo luno.

¹⁶⁶ Baana ba Kihebelu, panyuma ya kushinda lweseko, kana bafwainwa kwikela ku Kyambo kya mulaye, nangwa ine, babikilwe mu kwesekwa. Kabiji baubile byepi? Batambwile nsakwa ya balwany. Amena. Kika? Baiketetu mu Kyambo.

Ikalai na Kyambo, aja Jiwi ja Lesa jaamba kwi obewa.

¹⁶⁷ Pano, ene mambo kyo aambijile mba, "Pano, talai. Babilona, kechi kyakonsha kwikala kyapusanako ne. Mambo, atweba, inge twafukamina kikye kipasha, tubena kupopwela Lesa, nangwa byonkabyo. Kyawama, inge twikyuba *mujije* jishinda, twikitazha *mujije* jishinda."

Kyubilai monka Lesa mo aambijile.

¹⁶⁸ Pano ibyepi Lesa inge waambile mba, "Mosesa, mvula kwabilo yobe, Mosesa. Obewa uji pa mushiji wazhila."

¹⁶⁹ Aye waamba mba, "Nemusachila Anweba, Nkambo. Amiwa kine naketekela mwi Anweba. Amiwa nsakufumyakotu kisochi kyami, mu kyokyo mukifulo. Ke lukatazho lwabaya bingi ku kasulula sapato yami." Uu-uu. Uu! Kechi kyakonsha kwingila ne.

Aye waambile mba, "Sapato." Aye kechi waambile mba "kisochi ne." Ibyo.

¹⁷⁰ Mwafwainwa kwiya, mwaila ndonda, abya Lesa byo aamba, kabiji ne ndonda ya Kyambo Kyanji.

¹⁷¹ Pano, byo bajinga na lweseko, batambwile nsakwa ya mulwany ya mujilo. Bataine kuuba mba, byo baile bafika kupelo, kwikala pa Kyambo kya Lesa, batambwile nsakwa. Abyo ibyo. Panyuma. . .

¹⁷² Danyela. Kwajinga mukambizho wapainwe, ne kufwachikwa na bena Med-o-Pelesha, ao ubula kupipulwa ne, amba, "Inge muntu umo walomba ku lesa mukwabo, mulekai ataiwe mu jiyengo ja mabokwe." Kabiji Danyela wayukile mba Kyambo kya Lesa kyajinga kya kuuba mba, kulombelela Aye yekatu, nanchi washikwile mawindo na kulomba nangwa byonkabyo. Pano, aye kechi wabwelele mu koono ne. Aye washikwile mawindo na kutala ku tepo. Aye kechi wajinga na buvu nakyo ne.

¹⁷³ Kabiji kechi tubena kukeba kufunda bupopweshi bwetu pa Mulungu, kabiji Pakimo twauba kintu kikwabo ne. Nangwa,

kuketekela mu muchima wetu kintu kimo, kwiya ku muntu mukwabo ne kwamba mba, “Kyawama, Amiwa kechi nayuka ne. Ee, Naketekela mba uji bulongo.” Ikalaitu byonka byo muji. Inge kechi byo muji ne, fumaiko ku pulupiti, fumaimo mu kipwilo. Abyo ibyo. Mambo, obewa uji na lukatazho ku byonse bibiji. Ikala byonka byo uji. Amba byonka byo waketekela, nanchi obewa kechi wakonsha kufumamo ne. Obewa waimana monka mwaikela bukine. Muntu yense wayuka musango ye ujimo. Bantu bakakusachila, muntu uji yense.

174 Mwanamukazhi wakonsha kwikala wabula kulamba kukila-mukipimo. Aye wafwainwa kwikala wabaya, wanuna, mucheche, kikobatu, wasuki-yafita, meso-achiluluka, meso-akifufya, meso-atubuluka; umo, jishinda jimo, kabiji mukwabo ke jikwabo. Pakuuba umvwe awa mwanamukazhi watoka, inetu, kechi kujipo mwanamulume mu kyaalo ne kana wafwainwa kumuvujila kisochi, aye uji na kinemenezhi kya bwanabulume mwi aye. Ibyo. Mambo, aye—aye ulupula kyo aji nakyo, kabiji ne banabalume bamusachila.

175 Nanchi Lesa ukasachila muntu ao ukekala musango ye ajimo, nangwa bantu bamba mba Benakilishitu. Twayai twikale Mwinakilishitu, wayuzhiwamo na Mupashi Wazhila, na Kyambo kya Lesa, nangwa kulubako pakikye. Ibyo. Mambo, inge ne, wikala ke kafutufutu, kabiji wakwikala bumi bwapusanako. Kabiji bantu bamona wanyemena kuno ku bya kuzha, ne kupepa, kabiji ne bintu biji byobya, kabiji ne kwamba mba wi Mwinakilishitu, nanchi, monai, wabika kyakwitutulako mu jishinda ja bakwenu.

176 Monai anweba banabakazhi, bimye bimo, byo batenda suki ne kumvwala kabiji ne kuuba byubilo mu ooa mandeshi akala, amweka nobe muntu—ye basuba nangwa kintu kimo, kabiji ne kuya mu mukwakwa, na kwendauka, ne tushiko *twalepa* byobya, na kwizhonda mu mukwakwa. Bushe abo bu pentekosito? Nanchi abya—abya bipwilo bikwabo byamba mba, “Baamba mba baji na kintu kimo kyo babula ne.”

177 Obewa wabikwa katetesho ne kayukilo ka Mupashi Wazhila. Obewa kechi uji mu nzubo ya mazha bufuku buno kabiji ne kupakachilwa mu maboko a mwanamulume, ao wabula mulume obe; bufuku bwalondelapo, ne kubwela ku kipwilo na kuzha ponse ponse. Abo kechi bo bu pentekosito ne. Abo ke bukafutufutu. Abo ke busaji.

178 Amiwa kechi mbena kwibyamba kwi anweba ne. Bino, vulukai, ao matepu alengwa kuno aya pantanda ponse, nanchi Ne asapwilatu nobe a ku ntanda yonse. Inge Naumvwa Lesa kwamba mba, “Ambai kintu kimo,” Amiwa ne kyambatu, mambo Amiwa kechi nayuka ko kibena kuya ne. Akyo kijitu kwi Aye pakuuba mba ekale wakulamawizha kyokyo. Ikalaitu na Kyambo. Abyo ibyo. Kijitu bulongo.

¹⁷⁹ Ine, Danyele kechi wafukamijile mukambizho wabo ne, nangwa ataiwe pangye ya kabungwe nangwa ine. Aye waiketetu bulongo ponka pa windo, kabiji waikele na Kyambo kya Lesa. Aye kechi wajinga na buvu Nakyo ne.

¹⁸⁰ Kika kyamwekele? Bamutayile mu jiyengo ja mabokwe, bino aye waangachile bizhilo bya jiyengo ja babokwe. Kika? Lukumo! Mambo Lesa waambile mba...“Lukunwa Obe ukangata nsakwa ya balwanyi.” Nangwatu mulwanyi wa musango ka, uji na nsakwa. Oo, bimye binga byo twakonsha...?

¹⁸¹ Monai pe Mosesa, pakulondela mu ndonda ya mikambizho yakwa Lesa, wayile mu Ijipita, kyamwekelenga nobe bintu byonse byailetu mungi. Kwajinga bakusombolola bayilenga naji. Aye wayile na byavula bi—biyukilo, pa kumwesa mba watumwa. Wataile panshi muloolo, ne bikwabotu bya musango yewa.

¹⁸² Bakusombolola nabo kebeye, bataya yabo panshi. Kika kyo akonsha kuuba? Kafwako. Lesa kechi wamubujile mba bakoba kyokya ne. Aye wakebelenga kwesekwa Mosesa. Aye wajinga Ye Iye waswishe Yanesa ne Yambalesa kutaya panshi miloolo yabo, nangwa tumama twabo.

¹⁸³ Nanchi Mosesa waimene mu ndonda ya mwingilo. Wataya panshi kamama. Kaalukile ke muloolo. Aye waambile mba, “Talai pa kyokya, Felo. Abyo Nkambo yami byo ambujile mba ngiye, na kuuba kumeso enu.”

¹⁸⁴ Felo waambile mba, “Iyai kuno, Yambelesa ne Yanesa.” Batayile tumama twabo panshi. Twaalukile ke miloolo, byonka byaubile Mosesa.

¹⁸⁵ Kilungi kyanji bushe kyachijile? Ine, mwane. Aye watwajijiletu na kuketekela mba Lesa wamutuma. Aye waikele na yewa mulaye. Kabiji kika kyamwekele?

¹⁸⁶ Apo byo kikala nishi muji ku mbung’eno yenu. Kilungi kyobe kyakonsha kwaluka ke kichila, pachechetu. Ikalai na Kyambo.

¹⁸⁷ Kika kyamwekele? Ponkapotu, awa nkokola mukatampe wa kwa Mosesa waishile na kumina ikwabo. Lesa washinikishe. Panyuma ya kukwe kwesekwa, aye waambile mba, “Nakukeba, konka kubibye biyukilo, namba uleke baana bayenga. Nakeba mba wibatume babwele ku muzhi, konka kwabo. Lesa waikijile na kumbula, ne kutuma mba ke bapokolole. Nebakeba mba babwele.” Watayile kyokya panshi.

¹⁸⁸ Oo, kwesekwa kwamwekele. Mosesa, pano kika kyo usakuuba, aluluka, yangatu, kwaamba mba, “Kyawama, Amiwa kape naikala mukilubo”? Ine, mwane.

Mosesa waimene ponkapa, “Lesa wapaine yuwe mwingilo.” Lukumo!

¹⁸⁹ Lesa inge waamba kiji kyonse, ikala Nakyo. Nangwatu kyubiwe byepi, ikala Nakyo. Inge bakupanga ne kwamba mba,

“Atweba kechi tukekala na lumvwang’ano ne, kechi tukoba *kikye* ne,” ikala Nakyo.

¹⁹⁰ Mosesa waikele nakyo bulongo. Kika kyamwekele? Aye waangachile nsakwa ya balwanyi banji. Aleluya. Aye diabola waambile mba, “Amiwa nsakutanyika Kalunga Kabafu kulutwe yenu,” bino kashikukile. Abo kechi bakonsheshe kutwajijila kwibalama mu Ijipita ne. Aye waangachile nsakwa ya balwanyi. Kika? Mambo waikele na mwingilo Lesa ye amupele. Aya mikambizho yakwa Lesa, waikele na Kyambo kya Lesa kabiji waangachile nsakwa ya balwanyi.

¹⁹¹ Yoshiwa, panyuma yakupita mu lweseko. Aye wajinga konka, kapepo, waowele kwabuka Yondano, aye, ne Kaleba, na ba kukikizha ntanda. Byo abwelele kufuma ku Yodano, bafikile ku Kadeshi-Baleniya. Kabiji bonse baambile mba, “Oo, inge twatatula, akyo kikonauna kabungwe ketu. Atweba kuuba twatwelamo ne.”

¹⁹² Awa mupashi kechi ufwa ne. “Oo, atweba kuuba twaikala na Kyokyo ne. Inge twafunjisha Kyokyo ku bantu betu, kika kyotukooba? Twakonsha kusenda pepi nobe afu wa madikoni, mu kipwilo, kufumamo. Abo basongola jibiji, bimye bisatu. Kika kyo tusakuuba? Atweba, kika, inge twabuujile banabakazhi betu amba bamvwale suki yalepa, mwayuka byo bakonsha kuuba? Bafwainwa kufuma mu kipwilo. Kabiji twafwainwa kuuba byepi? Kika, twakonsha kumwekatu nobe bakala.” Yesu wajinga wa kimusango kyakala, ne aye. “Atweba kechi twakonsha kuuba kyokyo ne. Atweba kuuba twauba kyokyo ne. Kyakila bingi patweba.”

¹⁹³ Anweba mwayuka baitabila ba kumupaka bafwainwa kuya kwepi. Bahebelu, kyapitala kyabu 6, kilondolola pa kyokyo. “Aye wayuka kala, waalulwa ke wakutola lubaji ku Mupashi Wazhila, wabwela waponi, mu kumubwezha jibiji aye mwine.” Aye wafikile akwa ku mupaka ne kukana kwabuka, byo kiji, wakaine kwitabila yensetu.

¹⁹⁴ Mambo, Kaleba waubile ka? Nga Yoshiwa waubile byepi? Aye waambile mba, “Atweba twakonsha kwikitambula.” Kika? Baikale na kyokya Lesa kyo alaile.

¹⁹⁵ Kika, baambile mba, bakwabo baambile mba, “Kyawama, abo bazama. Abo babikwa nsakwa muzhi yense. Abo *baji* bibye. Kika, atweba kechi twakonsha kwibakwata ne, kafwako nangwa jishinda jimo ne.”

¹⁹⁶ Yoshiwa waambile mba, “Atweba twakila mu kwikyuba. Zhindamai, anweba bantu! Zhindamai! Ikalai panshi!” Amena.

¹⁹⁷ Nemubula mba, lwitabilo ke kintu kikatampe bingi, inge kyafika pa Kyambo kya Lesa. Aye kechi uji na moyo pano ne. Lwitabilo luji na suki pa kyaji, misunyi ikatampe. Waamba mba, “Zhindamaitu!” Byonse byashala binyemenatu mu kooni, abyo ibyo, inge Lesa waamba. “Ikalai mwi Amiwa, kabiji Byambo

Byami mwi anweba, mwakonsha kwamba kyonse kyo mwaswa.”
Byo byo kiji. Oo, Natemwa kyokyo. Hum!

Badiabola bazakama, kabiji bandengamambo
babuuka;

Lwitabilo mwi Yehoba lukasung’anya kiji
kyonse.

¹⁹⁸ Wakonsha kwikala byepi na lwitabilo inge wayuka mba kechi wakonsha kwingila ne, nakwenda mu Kyambo Kyanji, inge wayuka mba kuji byo wafwainwa kwamba kabiji wabula kwikyamba? Kuji bintu byo mwafwainwa kufunjisha kabiji wabula kwibifunjisha ne. Kuji bintu byo wakonsha kubula kwamba ne, kabiji wakonsha kwikala byepi na lwitabilo inge wayuka mba waya mungi?

¹⁹⁹ “Inge muchima wetu wabula kwituzhachisha ne.” Byo byo kiji. Abyo byo kiji. Bino ikala na kyokya Kyambo, kafwako nangwa kimo yakuzhatwa ne. “Kechi kujipo luzhachisho ku boba banji mwi Kilishitu Yesu ne, aba babula kwendela mu butunshi kana mu Mupashi.” Aye Mupashi utangijila na Kyambo, mambo Mupashi wakonshatu kufuma mu Kyambo, mambo Kyambo Kyanji ye Mupashi. Kabiji Kyakonshatu kwikala. . . Aye Mupashi wakine wa Lesa wakonsha kwamba Kyambo kya Lesa. Oo, ami! Ami, ami!

Mfumako, ntanda. Satana, tushe.

²⁰⁰ Kechi muvwe moyo wa kwamba ku yuwe mutumba, “Amba enda.” Kyambe. Ikala ponkapa, mona byo akonsha kupona. Abyo ibyo.

²⁰¹ Pakuuba umvwe uji na kuzhatwa kuji konse, kyawama—kyawama wazhindamatu. Obewa ubena kupangatu kyongyo. Obewa kechi ubena kwamba bukine ne. Obewa kechi ubena kwamba bintu byo wafwainwa kwamba ne. Kijitu bulongo.

²⁰² Twatana kuuba mba Yoshiwa, panyuma yakupita mu lweseko, aye wamwene bukamonyi bwa ntanda yawama, kabiji waimene pa Kadeshi-Beleniya ne kwijizhang’anya ku bonsetu, kabiji waambile mba, “Atweba twakila mu kwikitambula. Twakonsha kwikitambula.” Mwine mulanguluko wajinga ka? Kwabuka.

²⁰³ Mwine mulanguluko wakwa Mosesa wajinga muka? “Mweshi kikye kiyukilo kabiji ne kulupula baana.” Kabiji kyamwekele nobe wakakalwa. Bino waikele na Kyambo, kabiji kibelo kya Kalunga Kabafu kechi kamukwachile ne. Aye wapichilemo. Aye waangachile nsakwa ya balwany.

²⁰⁴ Yoshiwa, wamwene pa mulaye wakwa Lesa, waambile mba, “Atweba twakila mukwikitambula.” Abyo ibyo. Kabiji byo aishile ku Yodano, waubile byepi? Aye wapaine jishinda. Amena. Byokiji. Aye waangachile nsakwa ya mulwany. Awa Yodano wa mukanyinyenga kwabuka kuya bushiya na kutambula yewa

mulaye. Bino byo afikile kokwa, aye wajinga Lukunwa wakwa Abulahama. Kika? Aye waketekejile Kyambo kya Lesa. Ajo jojoka jishinda ja kwikelamo Lukunwa wakwa Abulahama, ke kuketekela Kyambo kya Lesa. Kabiji pano waubile byepi byo afikile pakuuba mba akumanye mulwany? Lesa washikwile nsakwa, kabiji wiyangachile, wiisenda, waabuka bushiya.

205 Kimye nkondo itanshi, malwang'ano anji atanshi o ajinga nao ne abo, bibumba bikatampe bingi pafwainwa kupita kalaki wa bambili peulu pakyo. Mujishinda ka ja kwi batinamo? Bamunyemene, babwelele mukachi. Mulwany byo akoba, ne aye. "Bino obewa ukasenda nsakwa ya balwany."

206 Waambile mba, "Nkambo, kika kyo Nakonsha kuuba?" Aye waendaukile, kimye kimo mute, na kulanguluka languluka. Aye wamwene Mwanamulume kasa aimana na poko Yanji yoololwa. Yoshiwa wasomwene poko yanji, ne kwamba mba, "Obewa wi wa kulubaji lwetu nyi? Nangwa Wi wa mulwany wetu?"

Aye waambile mba, "Amiwa ne Kapiteni wa iye zhita."

"Kika kyo Nakonsha kuuba?"

207 "Folai na kuzhokoloka, bimye satiini. Mvumyai ntolopita. Ukatola nsakwa ya balwany."

208 Yaponene panshi. Ee, mwane. Kika? Aye wajinga Lukunwa wakwa Abulahama, ao walamine Kyambo kya Lesa. Aye wasendele nsakwa yonse yaishile kwi aye. Kyakine.

Kimye kibena kupwa. Nafwainwa kuleka.

209 Talai, bonse bo babilobo bawama, bapewa kipepala kyayulwa po banembwa papo. Bino bonse bo babilobo bawama, abya bintu byo baubile, pakupezhako bafwile.

210 Pakuuba pano kwayishile Lukunwa mwine wa lwitabilo, awa Lukunwa Wazhila wakwa Abulahama, Yesu, mulaye. Abulahama wajinga na Izaka, kine, mwayila ku mubiji, pakuuba Lukunwa wakine kechi wajinga mu yewa musango wa kabungwe ne. Kyajinga mu yewa mulaye wa Kyambo kya Lesa, amba Aye ukumulenga kwikala shanja mikoka ya bantu, kechi kupichila mwi Izaka ne, kana kupichila mu Lukunwa Wazhila, Yesu. Awa wajinga Lukunwa Wazhila, ao, kine, Lukunwa wakwa Abulahama, Yesu, kechi wajinga Muyudeya ne, nangwa Aye kechi wajinga mu Ngetila ne. Aye wajinga Lesa. Mwamona? Aye. . .

211 Anweba ba Katolika kuno, peshai muchima wenu. Bino umvwe mwapopwela Maliya nobe lesa wamukazhi, lukatazho ka lo muji nalo, nangwa byonkabyo? Maliya kechi wajingapo kintu kikwabo ne kanatu mwanamukazhi. Lesa wamusajile. Aye wajinga mwakusemekelwatu. Byo byonka. Mwakusemekelwatu, abyo byo biji mwanamukazhi, bino aye uji ku lubaji lwa lukunwa wa mwanamulume.

212 Bino, ke jibumba jamvwangakana, bino Nafwainwa kwamba kikye pakuuba mba mwikyumvwishe kyo Mbeni kwambapo. Pano, telekai ku—ku dokotala wenu, kabiji Amiwa ne mulongo wenu. Kine, mwakonsha.

213 Maliya kechi wajingapo na mwabo mwi Kilishitu ne. Kechi kwajinga ng’umvwinu ya masongola kimye Mupashi Wazhila kyo amunyeng’amijile ne, nangwa pachechetu ne. Bino Lesa Wabulume bonse, aye Mulenga, walengele seo wa Mashi kabiji ne mwabo. Hum! Inge wajinga mwabo kufuma kwi Maliya, nishi bafu kechi bakonsha kusanguka ne.

Lukumo! Akyo kyaiyatu kipya. Najikwikimona kyokyo.

214 Nanchi inge waamba mba kechi pajipo lupusano ne, kyo tuba, nanchi kika Lesa kyo etubujila kufuma ku bintu byatama? Kika Lesa kyo aletejile awa mubiji wa Yesu, inge kechi kiji byo byo ne? Nanchi, mwamona, kechi kwakonsha kwikala mwanamukazhi wanungakana nakyo ne. Inge byo kyajinga, nishi mubiji Wanji walondejile Inanji, Maliya, mambo wajinga na musango wamasongola pa ku munyeng’amina mupashi ao wamulengejile—kulupula malume, kabiji ke kintu kiyatama. Aye Mupashi Wazhila, kupichila mu kwimita kwazhila, aleluya, Aye walengele malume a mwanamulume ne mwanamukazhi.

215 Bushe Yesu wamwichile mba “maama”? Kitanai mu Kinembelo. Aye wamwichile mba “mwanamukazhi.” Aleluya! Mwanamukazhi! (Ao ke mubiji wa nyama. Oene mambo kyo obila byo oba.) “Mwanamukazhi, tala mwaanobe.” Ma milyoni mailoshi pepi kwiaye kukila byo Ajinga.

216 Aye wajinga Lesa. Aye kechi wajinga Muyudeya nangwa mu Ngentila ne. Aye wajinga Lesa, byonse nyama ne mubiji, Lesa waikala mwi Aye. Lesa waikala mu malume a mwanamukazhi? Kuuba wi kwikyuba ne. Malume a mwanamukazhi ajinga na kya kuuba ku mibiji yetu. Pakuuba kyajinga Mashi kubikapo malume, abya Lesa byo amunyeng’amijile.

217 Aye wafwajilwe kumubika pa kishiki inge Aye wakebelenga. Ee, mwane. Aye wafwajilwe kubika kuji konse Aye koakebelenga.

218 Bino Aye wikiletele mambo mwanamukazhi ye wajinga mu kupona. Kwaishile Mwaana wazhila wakwa Lesa mumi, walengwa, mu lusemo lwa kisungu, konse ku mubiji ne mweo.

219 Kika Davida kyoaambile mba, “Amiwa kechi kamona Wami Wazhila ne. . . kuleka Umo Wazhila Wami amone bubole ne, Wami Wazhila Umo amone bubole. Nangwa Amiwa kechi kaleka mweo Wanji mu kalunga kabafu ne”? Davida ye waambile byo byo. Mwamona? Byonse mweo, mubiji, ne mupashi, byalengelwe kwi Lesa, monka mwi Aye.

220 Mwanamukazhi kechi wajinga inanji ne, wajinga mwanamukazhi. Naketekela wajinga mwanamukazhi wawama,

mwanamukazhi wazhila, kyakine. Aye kechi mwajinga mwakusemekwa ne, Lesa kuuba wasala mwakusemekelwa muji ndonchi ne. Nkambo inge waswa, Nsakusapwila pa kyokyo bufuku buno. Bino—bino waambile mba, “Amwa mwakusemekelwa muji ndochi mu kuleta Wanji—amba alete Mwaana Wanji pantanda? Aye wasalulwile kisungu, wabula kuyuka mwanamulume ne.” Nangwa kechi watambulwijilepo malume ne, nangwa kiji kyonse ne, Mupashi Wazhila byo amunyeng’amijile, mambo, Lesa, mu kuzhila Kwanji, musango wabula mpelo, walengele mwi aye, mweo, mubiji, ne Mupashi wakwa Yesu Kilishitu. Abyo ibyo. Aye wajinga Mwaana wasemwa-mukisungu.

221 Akya kyaubile byepi? Kyachimwine nsakwa ya balwanyi. Aleluya! Yii! Akye kibena kumweka kuwama, kwi amiwa. Talai. Kika? Aye waonawine nsakwa ya balwanyi ponkapa, amba muntu yense wasemwa panopantanda na nkebelo ya masongola, ao wakonsha kubula kuya Mwiulu ne mambo bukende bo bwatapile mu ntendekelo, mu bujimi bwa Edena, o mambo o bemvwetajile abo bene. Aye byo Abubile kyokyo, Wa abenyepo pabiji ponkapa, ne kwangata nsakwa ya balwanyi. Kupichila muka? Kutambula Lukunwa Wazhila wakwa Abulahama, ponka pa kimye kitanshi, kabiji wikyonawine kufikatu ne panshi. Awa Lukunwa Wazhila wa lwitabilo ne mulaye, kechi kwimita kwakwa Maliya ne, kana kwakwa Lesa, waonawine mansakwa. Kuuba mba, lekai muntu apite mu kibelo. Lukumo lwikale kwi Lesa!

222 Kika Aye kyo aubile? Pano po asendele bizhilo byonse bya mulwanyi. Aye watolele nsakwa ya misongo. Misongo kechi yakonsha kwikala mu Kyeenyi Kyanji ne. Ine, mwane. Nangwa kiji kyonse kintu kechi yakonsha kwikala mu Kyeenyi Kyanji ne. Tachikilo ya kijilo kechi yakonsha kwimana mu Kyeenyi Kyanji ne. Ine. Kika kyo aubile Aye?

223 Yoshiwa wafwile. Mosesa wafwile. Bonse bashala bafwile, bino kechi yuwe Lukunwa Wazhila ne. Lufu kechi lwakonsha kwimana paji Bumi ne.

224 Awa mwanamukazhi kufuma ku Nine, waishile na nsongwalume wanji. Waimene ne kwamba mba, “Imana, mwaana.”

225 Awa nsongwakazhi wafwile, mwaana wamukazhi wakwa Jailosi, Aye waambile kyambo kunyuma kokwa mu ntanda yabula kuyukanyikwa, kabiji waambile mba, “Mwaana wamukazhi, imana.”

226 Lazalaza, wafwa moba foolo ne mubiji wanji watatula kubola, kabiji mweo wanji wafuminemo, pa moba foolo. Aye waambile mba, “Lazalaza, lupukamo.” Lukumo!

227 Abyo byo Aji. Kika kyo aubile Aye? Aye walajile tutetesho twa bintu byonse. Aleluya!

228 Kimye byo kyafikile kya kufwa Aye, Aye kechi wakanyinye bobwa bumi ne. Aye inge kechi wafwile ne, bino Aye wapaine bobwa bumi. Kabiji Aye byo apaine abwa bumi, Aye wafwile lufu. Kabiji mweo Wanji wawama, nobe byonka byaamba Baibolo, waikijile mu kalunga kabafu, wasendele kifulo kyami ne kifulo kyobe. Awa Lukunwa Wazhila wakwa Abulahama! Kika? Aye wajinga Lukunwa Wazhila. Oo, lukumo!

229 Pano atweba twi Lukunwa Wazhila, kika, awa wikala na Kyambo, pamotu nobe byo Ajinga. “Mambo mu ntendekelo mwajinga Kyambo, ne kyokya Kyambo kyajinga na Lesa; kabiji ne kyokya Kyambo, kya aalukile ke muntu, ne kwikala waikelenga muno mwetu.” Kechi mwamona paikala Lukunwa Wazhila ne? Awa Lukunwa Wazhila ke yewa waikala na Kyambo.

230 Anweba mwanekena mubena kuswa munekenya bintu pamo na diabola, na mafwashi anji a muntanda. (Amiwa kechi mbeni kwamba kwi anweba kuno ne.) Kokwa, anweba basapwishi mwayuka mba musapwila mba moba abya kukumya apita, anweba musapwila mba kechi kujipo kintu kya kwamba mba lubatizhilo lwa Mupashi Wazhila ne, kimulenge buvu anweba, kabiji ne kwitela anweba bene mba Lukunwa wakwa Abulahama.

231 Awa Lukunwa Wazhila wikala na Kyambo. Lukunwa Wazhila, kechi wasemwa ku mwanamulume ne, kafwako nangwa kimo kya kwingila na mwanamulume nangwa mwanamukazhi ne. Awa mwanamukazhi ke kipwilo; kafwako kya kuuba na kipwilo ne. Maliya kechi wajinga na kyakuuba na Lukunwa ne. Nangwatu kipwilo, kitelwa-mba kabungwe, kechi kijipo na kya kuuba na Lukunwa ne. Kyasemwa kuka? Kechi na kabungwe ne, kechi Methodist, Baptist, Presbyterian, Katolika, Lutheran, ne bikwabotu ne.

232 Bino, wasemwa ku Lukunwa Wazhila wa mulaye wakwa Lesa, awa ye iye umenda nsakwa ya balwany. Kya mwangachilwa kala. “Mambo umvwe mwaikala mwi Amiwa, kabiji ne Kyambo Kyami mwi anweba, ipuzhai kyonse kyo mukeba, kikemubilwa.” Byobyo kiji. Ke mulaye. Kyaubiwa kala.

233 Mweo wanji wawama waikijile mu kalunga kabafu, ako ko Nafwainwa kuya. Pakuuba pa joja juba ja busatu. . . Samisoni wa kutolele kibelo kya muzhi pa nyuma yanji, kechi wajinga nangwa na kimo kya kwingila nakyo ne. Aye watolele bizhilo bya ngehena, bizhilo bya kilende, kabiji ne bintu byonse. Aye kechi wikitwajile pa mutumba ne, bino Aye wikyonawine. Aleluya! Aye watambwile nsakwa ya balwany.

234 Mulwelele mwayujile na bulume bwakwa diabola, mwiulu, kya kuuba mba Bamalaika nangwa kintu kiji kyonse kechi kyakonsha kwikila ne. Kechi kwajingapo bya kusashijila ne, mambo mashi a bambuzhi kechi akonsha kufumya bubi ne. Pakuuba Mashi Anji mwine afumishe bubi.

235 Kabiji Aye waile Mwiulu, ne kutangijila jibumba. Aye wapaine bya bupe ku bantu. Pano, yense wa mu Lukunwa wakwa Abulahama ubena kuswa malipilo, kwiya na kulapila bubi bwabo, ne kubatizhiwa mu Jizhina ja Yesu Kilishitu mululekelo lwa mambo enu, wayulwa na Mupashi Wazhila, ne kupita mu lweseko.

236 Kabiji inge ntanda yafumamo mwi obewa, bintu byalupukamo, bintu byonse byatama, kintu kyonse kyamwekanyika nobe k yatama, nobe banabakazhi na suki yabo, banabalume na byubilo byabo, kabiji ne bipwilo na tubungwe twabo, kabiji ne—kabiji ne kafunga upana ku bakwashi banji, kabiji—kabiji ne byonse byo bintu. Bintu bino bya muntanda byatwelamo ne kulengela kamulanda kafunga, bamupanga mu kipwilo.

237 Yainga, kafunga. Lesa akupeshe. Ikala bulongo na Kyambo. Kusenda kiji kyonse ne.

238 Aye wayile Mwiulu. Kika Aye kyo aubile? Aye wachibile jilozo, nsakwa, amba, milombelo ya yuwe Lukunwa wa Abulahama. Kika? Kika? Inge twi Mubiji wa Kilishitu, inge twafwa, atweba twimona atweba bene twafwa kabiji bazhikwa mwi Kilishitu, kabiji ne kusanguka Nanji mu lusanguko. Aye ye Mutwe wa Mubiji. Kuji Mutwe, ne Mubiji uji Nanji. Kabiji pano, lukeelo luno, yense waubile kyokyo, “waikala Nanji mu bifulo bya mwiulu,” na Lukunwa Wazhila. Takaikai Lesa.

239 Kafwako mansakwa. Anweba kuuba mwalomba *kufika* pano ne, ne kwamba mba, “Oo, oo, akwa *kuji* kyambo.” Uu-uu. Bakunshikila pangye, ponkapatu.

240 Pakuuba michima yentu inge ne kwituzhachisha ne; inge twayuka mba tubena kwenda mu mikambizho yakwa Lesa; twamona bumi bwetu bwatokeshiwa; twibumona; Kyambo kyonse kyo akambizhe Lesa, Twikilama; apa bino mansakwa onse a mulwanyi aangachiwa. “Pano ipuzhai kyomukeba, kikemubilwa.” “Aye ukangata nsakwa ya balwanyi banji.” Oo, mulongo, kikekala kipwilo kya musango ka!

241 Inge Nabwela jibiji ku Phoenix, inge Nkambo waswa, Naketekela, inge naenda kwiya mu ino tabbanako, abye bipona bikatatama mundonda, kabiji kipona kiji kyonse kya ng’endo ya ba Mamboawama onse mu uno muzhi bakatatama mundonda na bazhijikwa ba Lesa mumi: wamweka nobe Mwinakilishitu; kwamba nobe Mwinakilishitu; kuuba byubilo nobe Benakilishitu; na Mupashi wakwa Lesa kasa abena kwenda mukachi kabo, apo, inge muntu umo wakonsha kulenga mambo, aye Mupashi Wazhila wakitela ponkapatu.

242 Ukeyyuba. Mwajikwikimona mu mulaini wa milombelo, nobe kuno ku kitapisho. Kwepi, ne kwamba mba, “Yanga bwela kokwa ne kuwamisha bintu na mulume obe. Yanga, ukabuule mukazhaji obe amba wafuminepo, bufuku bwapichile

masoshi, na yewa mwanamukazhi, twaikele pa kifulo kya *kananga-kananga*.” Inge Kyakonsha kwikyuba kuno, kupichila mu kwenda mu Kyambo, na kuteleka ku joja Jiwi jicheche, Jakonsha kwikyuba mwi anweba. Obewa wi Lukunwa wakwa Abulahama. Nanchi, bubi bufwako.

²⁴³ Musapwishi, kechi wakonsha kutemwa kumona kyokyo mu kipwilo kyenu nenyi? Endai mu kino kipwilo, ne kutala panshi konse *mumwe*, monai bonse babiji banabalume ne banabakazhi, bulesa, bazhijikwa, baikala ponka kasa bayula na bulume bwakwa Lesa. Bubi kechi bwakonsha kwendamo ne. Muntu watwela mukachi ne kwikala waikala, Mupashi waimana ne kwamba mba, “Yoano Jones, wafuma ku *kananga-kananga*, muzhi, kifulo kya *kananga-kananga*. Aye uji pano na kukeba lubuko lwa mubiji wanji. Mwamona? Aye waubile *kintu* kimo pa *kifulo* kimo. Aye waubile *kikye*, kabiji wasendele, wafwainwa *kubwezha* kikye, wamisha *kikye* bulongo, apo Lesa po asakwimubuka ku kooka kaasa. ABYO BYOBYAAMBA AYE NKAMBO.” Ami, ami!

²⁴⁴ Mpai kipwilo, mpai bantu teeni, yuzh-. . . , kine buneme bwakwa Lesa, awa Lukunwa Wazhila, babikai bantu pamo, kabiji monai bika bikobiwa. Mpai iye nzubo icheche yayula bantu byobya, kabiji Nkemumweshwa Kyeya ntanda kyo bakanyemenako. Aboyo ibyo. Aboyo Lesa byobyo etukebela mba twikale. “Obewa wi muzhi waikala pa mutumba.” Obewa wi Lukunwa Wazhila wakwa Abulahama. “Ukangata nsakwa ya balwanyani banji.”

²⁴⁵ Misongo, kuji kintu kilengela misongo. Kuji kintu kilengela bibye bintu. Kabiji Lesa, Mupashi Wazhila, uji pano na kusolola kyokya kintu kabiji ne kubuulang’ana kika kyo ubijila kwikitambula. Lukatazho luji kwepi ne atweba? Kechi twafwainwa kukumya ne, “Bushe kikobikwa nyi?” Kibena kubiwa kala. Ubeni kuba ka?

²⁴⁶ Monai yewa ngauzhi. Aye kechi watelekele ku mwela upupa ne, “Lukumo lwikale kwi Lesa! Aleluya!”

²⁴⁷ Akyo kyawama. Pano, vulukai, Amiwa kechi mbena kuzhachisha kyokyo ne. Naketekela mba bonse baumvwa kyokyo. Muntu umo waambile mba, “Mulongo Branham kechi waketekela mu kwamba mba, ‘Lukumo lwikale kwi Lesa! Aleluya!’” Kyawama, talai kwi amiwa kuno pano. Naketekela mu kubijika, kwamba na jimi, kuzha mu Mupashi.

²⁴⁸ Bino, mulongo, inge wakakalwa kumvwa aja Jiwi jicheche ja Kyambo, akyo kyo kintu kikutana. Akyo kyo kintu.

²⁴⁹ Elaija wayukile mba konse kwe kusangululwa kubena kubiwa pangye. Bino aye wajinga. . . Kechi kyamukebwile kuya pangye ne. Pakuuba byo aumvwine aja Jiwi jicheche ja Lesa, popo akebwelwe. Kabiji aye wamvwetele kilungi

kyanji, walupukamo. Kika? Elaija wajinga Lukunwa wakwa Abulahama, walondejilenga Kyambo.

²⁵⁰ “Inge mwaikala mwi Amiwa ne Byambo Byami mwi anweba, nanchi ipuzhai kyonse kyomukeba, kikemubilwa anweba.”

Twayai tukunyiike mitwe yetu pa kakimye kacheche tulombe.

²⁵¹ Oo, kipwilo, byepi, inge Napwisha kusapwila byobya, byo Mbena kumvwa! Aye Mupashi ufuma pe amiwa, kabiji Amiwa ntala panyuma, Amiwa mona bantu baya panshi mu pokochi wabo ne kutola kajo ka baana babo, na kupana kwi amiwa. Namona banabakazhi babacheche baji muno, kape na suki yaipipa, bakonsha kuuba byepi? Bakonsha nkungubila kiji kyonse mu ntanda kyo bafwainwa kuuba. Mwanamulume kwikala na mukazhi byobya, kabiji amiwa kasa mbena kuchibaulatu mu bipimvwa na Kyambo, na kukozhang’ana, milanguluko yanji yapona panshi, kabiji nangwa byonkabyo awa mwanamulume wafwainwa kuya kuno mu buzha, ne kutumina bya bujikumi. Abyo ibyo. Nanchi akya kindengela Amiwa kumvwa buvu, ne kubwela ku mubiji, mwikyumvwa, “Kika kyo—kika kyo Naubile?” Amiwa kechi natazha mukuuba mba ne mukozhe ne, kechi kyokyo ne.

²⁵² Bino, oo, mulongo, kabiji mutemwe wami nyenga mucheche ne mulongo, inge akya kyaikala Kyambo kya Lesa, kabiji awe ye Mupashi Wanji ubena kulengela kyokya Kyambo kwikala na bumi, kwi obewa, kikekala byepi pa Juba ja Buchibishi bwamambo? Amiwa mbena kweseka kwimunengezha na mambo ajoja juba. Nasashijilapo, nasashijilapo anweba sendaitu Kyambo Kyanji. Inge Nakonsha kusapwila kiji kyonse akyo kyabula Kyambo ne, mulaye wakwa Lesa, nanchi uji na nsambu ya kwiya kwi amiwa. Bino akyo kyo Kyambo. Kabiji ke mambo akuuba mba Nemutemwa.

²⁵³ Kechi mambo akuuba mba Ami—Amiwa kechi mbena kwimukeba mu bwato ne. Ke mambo akuuba mba bwato kechi bukemusenda ne. Anweba mubena kuya na konaika, juba jimo jibena kwiya.

²⁵⁴ Obewa wafwainwa kwiya ku Buchibishi bwamambo. “Wazhatwa mutucheche ke kuzhatwa mu byonse.” Kabiji inge mwayuka mba kintu kimo kijitu bulongo kwikyuba, ke Kyambo kya Lesa ne mulaye kwikyuba, kabiji wabula kwikyuba, pano nga pakyokyo? Obewa ukepuzhiwa kupana ene mambo ka, kika pano? Umvwe ino Mbila lukeelo luno ya kukumanya kubushiya bwa kilola, pa Juba ja Buchibishi bwamambo, pano ngakyo? Kilangulukaipo, balunda. Anweba mwafwainwa kufwa juba kasa jikyangye kufika ne. Atweba bonse twafwainwa. Kabiji kintu kimo kya bukine, anweba mukafwa.

²⁵⁵ Naimene juba jikwabo na kumutala bamaama, amiwa kasa mbena kwibakwachijila mu kuboko kwami. Nakwachile bataata kunyuma pacheche, kabiji ne bamwene byo bayile.

256 Nebamona baiya kupelo ya mukwakwa, abo balangulukilenga mba bajitu bulongo. Kwaamba mba, “Oo, Mulongo Branham, oo, inge Nakonsha kwikala na bumi bwalepako pacheche!” Kimye kikekala kyapwa kala pakyokya kimye. Kabiji vulukai, lufu kechi lupipula mweo ne, lupipulatu kifulo kya kwikalamo. Kabiji umvwe wamona mba kingtu kimo kiji mwi obewa, langulukaipo pano, inge wamona mba kintu kimo mukachi nkobe kibena kukulengela kuuba byobya byubilo kabiji ne yoya ng’umvino, kyakuuba nobe kechi uji na ng’umvino ne, lapilai lukeelo luno. Mwakonsha nyi, mulunda? Iyai. Wikale... Obewa kechi wafwainwa kwikala muyewa musango ne. Obewa wi muntu muyaji. Ikalai na bumi bwa kine bwa Lukunwa Wzhila. Lesa ubena kwimukeba leelo.

257 Mwakonsha kusutulako kuboko kwenu, kimye mutwe wenu kasa akunama, ne muchima. Kwaamba mba, “Mulongo Branham, Nasutwile kuboko kwami kwi Lesa. Kyakishika, kufuma mu muchima wami, akyo kyo Mbena kukeba kwikala. Akyo kine kyo Mbena kukeba kwikala. Amiwa na—Amiwa na lubakanya bintu papo kabiji ne byavulatu, bino kine Amiwa—Amiwa kechi mbena kukeba kwikala byobyo ne. Nakeba kwikala byo wajikwambangapo lukeelo luno. Ndombeleleko, Mulongo Branham. Amiwa mbena kusutula maboko ami kwi Lesa, kechi kwi obewa ne, Mulongo Branham, bino kwi Lesa. Kabiji mu muchima wami, Aye wayuka muchima wami, Amiwa keba kwikala musango wa Bwinakilishitu ye ubena kwambapo, Lukunwa Wazhila wakwa Abulahama, kupichila mwi Yesu Kilishitu.” Sutulaiko kuboko kwenu ne kwamba mba, “Amiwa nsakuba... Ndombeshapo, Mulongo Branham.” Lesa emupeshe. Lesa emupeshe. Kine Aye ukemubilakyo.

258 Taata Wetu Wamwiulu, mu Kyeya kya Kyambo Kyenu, mu bulume bwa lusanguko Lwenu! Kabiji Nalanguluka, Nkambo, mba bantu bakamulanda bimye byavula bazhobakana mumwe, kupichila mu byapusa... Bantu kechi bayuka kyakuba ne; umo ubena kwiya, na kwamba kintu kimo; kabiji mukwabo ubena kwiya, na kwamba kintu kikwabo.

259 Kabiji kuno mu Phoenix, uno muzhi mukatampe wa—wa, kyawama, bakang’enda, ako bintu byonse mwaya kyaalo biiya kuno, byonse bya ku mubiji ne bya bu mupashi. Pa kwimana pa mutumba, juba jikwabo, kabiji kasa ndanguluka bimye binga Jizhina ja Lesa po jingijishiwa kyatuntu kuno, bya bukende biinga byubiwa, bubi buunga ne byatama mu mikwakwa muno, ne bikulwa bya maalwa ne mapuzha mwakutomena, kabiji ne bintu byonse, bavula ba mwiabo betela mba baitabila, Benakilishitu!

260 Banabakazhi benda mu mukwakwa, na kasanga mu maboko abo. Kwenda na bya kuvwala byatama, byo Mwaambile mba binuka ku meso Enu, “Ke kyabunya,” nobe kyakala, ndochi, kyabusanji, mwakusukwila munuuka. Anweba Lesa,

mwanamukazhi wamba mba uji na Mupashi Wazhila wafwainwa kuuba byepi byo byo kintu, kabiji kasa ayuka mba mu myona mwa Mupulushi munuuka byo byo, mwanuuka? Aye Wakonsha kwikala na kintu kya musango yewa mu Bufumu Bwanji? Taata, inge bakonsha kuyuka, baji ma milyoni mailoshi kufuma ku Kyokyo.

²⁶¹ Nalomba, Lesa, ngubilai lusa. Kafwako nangwa umo ukeba kuya ku byo bya bifulo bya balubilamo. Kafwako nangwa umo ukeba kuyako kokwa ne, Taata. Kikale kwalepa umo wa mwiatweba kuyako. Nangwa byonkabyo mu yewa muntu muji muchima wawama, awa mwanamulume, awa mwanamukazhi, mwanamulume nangwa mwanamukazhi upana ku bakajilwa ne kuwama kabiji wa lusa, kabiji wajimbaikwatu kwi diabola. Diabola ye wauba kyokyo.

²⁶² Satana, Amiwa na kwimena obewa, mambo obewa wi mulwany wa Nkambo yami. Obewa wi mulwany wa Kyambo Kyanji. Kabiji Amiwa na kukambizha, mwi Yesu Kilishitu, aye Mwaana wa Lesa, nobe mu bumuntu, byo nayuka mba kechi Njina bulume mwi amiwa mwine ne. Amiwa kechi jipo na bulume bwa kwimukanya ne. Amiwa kechi jipo na bulume bwakomvwa banabakazhi batokeshiwa ne, bonse bo banabalume, babena kuteleka ku uno tepu, nangwa—nangwa kuji konse ne. Amiwa kechi njipo na jishinda ja kwibatoksha ne. Amiwa bulume mfwabo. Bino Amiwa njina luusa lwa Kyambo kya Lesa, nobe kalume, bwa Kwikisapwila, kabiji njina mwingilo wafwainwa kulolwa luusa. Nangwa baabo bakapokola kokwa kechi baji na ngovu ya kwimika motoka ne, bino uji na luusa lwa kwikyuba.

²⁶³ Kabiji, Satana, wafwainwa ne obewa kuya na kunshaka mambuleki, mambo Nakukambizha, mwi Yesu kilishitu, amba ulekeleko baabo bantu bakasuluke, mu kyaalo kyonse kya panshi, konse kukaya iye Mbila. Balekeleko. Ne bakabila, pakuuba mba baletwe. Kechi baji bunke bwabo ne. Abo bapotwa na mutengo, abo ke ba Lukunwa Wazhila wakwa Abulahama, aye Nkambo Yesu.

²⁶⁴ Obewa busaji, ndochi, kafutufutu ununka, ujimbaika bantu, na kwibatangijila na bupofu kuya mu bimbo bya ngehena, balekeleko. Amiwa nakukambizha obewa, monka mwi Lesa mumi, monka mu Kitapisho kya Mwaana Wanji, Yesu, amba wi balekelako, pakuuba mba myeo yabo iyuzhiwemo na mapesho Anji ne Kyeenyi Kyanji, pakuuba mba bangate nsakwa ya mulwany uji yense. [Kafwapo bijipo pa tepu ne—Waku.] Obewa wibalenga kwikala babena kupembelela *kikyey*, *kyokya*, nangwa *kikwabo*, nangwa kukwatwa kumo kwazhila, nangwa kintutu kikwabo, bino Mbena kwamba mba obewa usakulekelako kukwata kobe.

²⁶⁵ Nga misongo yafwainwa kukwata byepi mwashingwa manyi

bibye? Kanatu bakana kutala kulutwe ku mulaye nobe byonka byaubile taata Abulahama, amo mo amumwenenga Aye mu kipasha kya myaka aduleendi kyajinga kwalepa, kasa kibena kwiya.

²⁶⁶ Balekeleko. Mu Jizhina ja Yesu Kilishitu, baleke bantu bayenga.

²⁶⁷ Lekai bulume bwa kwa Lesa, kukwatakanya kwa Kyambo, nobe byo baomvwewa lukeelo luno kwi Akyo, lekai kukwatakanya kwa kulama Kyambo kya Lesa kabiji ne milaye Yanji ya kine, ikwate kya kuuba mba Satana kechi wakonsha kuchiba ne. Lekai umo umo akwachijile awa mulaye, ne kwamba mba, “Akye kyo Ikyo. Amiwa nakwachijila kwi Akyo. Lesa walaile. Amiwa ne lukunwa wakwa Abulahama. Nakonsha kuzhinauka byepi mulaye Wanji?” Kabiji ne kwenda kuya kulutwe, kupichila mwi Yesu Kilishitu, Nkambo yetu. Amena.

Namutemwa Aye . . .

²⁶⁸ Yaikala ya konsa lukeelo luno, balunda. Twayai tupopwele pano na buwame.

Mambo Ye mutanshi kutemwa
Kabiji wapotele lupulukilo lwami
Pakichi kya ku Kalvali.

²⁶⁹ Bushe kyakonsheka kubiwa, kechi myendeleko ne, kine ine . . . Akye—ke bupopweshi. Twayai tusutule maboko etu kwi Aye ye twatemwa. Kabiji ne kwamba mba:

Namutemwa Aye, Namutemwa Aye
Mambo Ye mutanshi kutemwa
Kabiji wapotele lupulukilo lwami
Pakichi kya ku Kalvali.

²⁷⁰ Pano, ku yense mwanamukazhi nangwa nsongwakazhi uji muno, akwe ke kuboko kwami. Lesa wimutemwa. Ku mwanamulume yense nangwa nsongwalume uji muno, Lesa wimutemwa. Nemutemwa. Pano, Amiwa kechi nakonsha kufika na kukwata kuboko kuji konse ne, pakuuba Lesa wafikizha kwi anweba mo Nekitazha. Kimye kyo tubena kwimba byobyoy jibiji, alulukaitu ne kwiyimuna na muntu umo. “Pakuuba mba bantu bonse bayuke mba anweba mwi banababwanga Bami, inge mwaikala na butemwe, umo na mukwabo.”

Ami . . .


. . . wapotele lupulukilo lwami
Pakichi kya ku Kalvali.

Namutemwa Aye, Namutemwa Aye
Mambo Ye mutanshi kutemwa
Kabiji wapotele lupulukilo lwami
Pakichi kya ku Kalvali.

²⁷¹ Kechi mwamutemwa Aye nenyi? Ng'umvwino yawama ya Mupashi Wazhila! Akyo Kyambo ke jishinda ja kutokesheshamo, jikufumyamo, ne kukulenga ke kilengwa kipya, ne kufumyamo byonse. Akyo Kyambo kyatwisha kukila mapoko atwa-kubiji, kutwala ku mukanda, kuchibaula bintu byonse bya muntanda. Mwamona? Ipo po tumvwa kutokeshiwa, kufumishiwamo, ku muswa ne kumuketekela Aye. Abyo byo twafwainwa kwimba:

Namutemwa Aye, Namutemwa Aye
 Mambo Ye mutanshi kutemwa
 Kabiji wapotele lupulukilo lwami
 Pa Kalvali.

²⁷² Akyo kyawama? Amiwa nekitemwa na muchima wami yense. Mwamona? Twayai twikyeseke ne jikwabo, muntu yense pano, kine, pano na jivi jenu jaya peulu.

Namutemwa Aye, Namutemwa Aye
 Mambo Ye mutanshi kutemwa
 Kabiji wapotele lupulukilo lwami
 Pa Kalvali pa . . . 

62-0121M Kabiji Wa Mulukunwa Obe
Ukangata Nsakwa Yabalwanyani Banji
Lwitabilo Tabbanako
Phoenix, Arizona U.S.A.

KAONDE

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org